

মহাভারতী

শ্রীযতীন্দ্রমোহন বাগচী

প্রবর্তক পাবলিশাস
৬১ নং বহুবাজার স্ট্রীট
কলিকাতা



প্রকাশক :
শ্রীরাধারমণ চৌধুরী বি. এ.
প্রবর্তক পাবলিশাস
৬১ বহুবাজার স্ট্রীট,
কলিকাতা ।

BCU 3494

255029

তৃতীয় সংস্করণ : ১৩৫২
মূল্য—দুই টাকা

শ্রীগুরুদাস বসু কর্তৃক মুদ্রিত
প্রবর্তক প্রিন্টিং এণ্ড হাফটোন লিঃ
৫২/৩ বহুবাজার স্ট্রীট,
কলিকাতা ।



কবিত্রাতা
শ্রীমান্ কালিদাস রায়
করকমলেশু

"ইলাবাস" : হিন্দুস্থান পার্ক,
বালিগঞ্জ, কলিকাতা

গ্রন্থকার
বৈশাখ, ১৩৪৩

সূচী

বিষয়	পৃষ্ঠা
কর্ণ	১
দুর্ঘোষন	৮
ভীম	১৫
শবরীর প্রতীক্ষা	১৭
অশোক	২৩
জয়-পরাভয়	৩৬
বাসবদত্তা	৪১
কষ্টি-পরীক্ষা	৪৬
মহানন্দমঠ	৫০
সমীরণ	৫৪
প্রাচীনার প্রলাপ	৫৭
প'ড়ো বাড়ী	৬২
আম্বাচে লেখা	৬৬
প্রতিশোধ	৭১
ভক্ত ভোলা	৮৩
মুক্তিপথ	৮২
হুঃখবাদী বন্ধুর প্রতি	৯২
ভাটিয়ালী	৯৫
পকাশোর্কে	৯৯
সন্ন্যাসী	১০১
অনাগত	১০৪
তাজমহল	১০৬
কৃষ্ণা	১০৯

মহাভারতী

কর্ণ

—পাণ্ডুপুত্র সহোদর মোর ?—কুন্তী আমার মাতা ?
কর্ণের ভালে এ কি পরিহাস লিখিয়াছ, হে বিধাতা !

পৌরুষে শুধু সেবি' নিশিদিন

যে কর্ণ চিরসঙ্কোচহীন,

ভীষ্মসেবিত দুর্যোধনের শত্রুভয়ত্রাতা—

সেই শত্রু—সে সহোদর তা'র ?—শত্রু-জননী মাতা !

নহে, কভু নহে—মানে না কর্ণ গুপ্ত সে অধিকার,—

কর্ণ পুরুষ, পৌরুষে শুধু স্বীয় ইতিহাস তা'র ;

কোথা তা'র পিতা ? মাতা তা'র নাহি ;

একা সে চলেছে সম্মুখে চাহি'—

খড়্গা-খোদিত দুর্গম পথে বীর্যের অভিসার ;

ধিক্কৃত কোনো দৈব অতীত কর্ণ মানে না তা'র ।

মহাভারতী

ইন্দ্রের তেজ, শিবের শক্তি, কৃষ্ণের মন্ত্রণা,—
ধনঞ্জয়ের ধার-করা ধনে গণে সে আবর্জনা !

অর্জুনই তার একক বিন্দু,
কৈতবহীন স্বাধীন চিত্ত,

নিজ ভুজবলে করে সে নিত্য শক্তির আরাধনা ;
ধনঞ্জয়ের ধার-করা ধনে গণে সে আবর্জনা !

বসুন্ধরার বীৰ্য্য-শুদ্ধে শুধু তা'র প্রত্যয় ;
বাহু ছাড়া তাই কোনো বিক্রমে নাহি তা'র পরিচয় ;
কৌশলে ?—তা'র চির ধিক্কার,
কারো কাছে কিছু নাহি ভিদ্ধার—

কুণ্ডলসম সহজাত তা'র শক্তির সঞ্চয়,
অক্ষয় তা'র কবচের মতো অক্ষত প্রত্যয় !

—পূৰ্ব্ব-তোরণে দামান্না বাজিল—আসে বা হুৰ্য্যোধন !
কল্য সমরে সেনাপতি মোরে করিবে, করেছে মন ;
নাহি সে ভীষ্ম—নাহি আচার্য্য,—
মোরই রক্ষিত এবে সে রাজ্য !

—সানন্দে তাই করিব গ্রাহ্য বন্ধুর আবেদন ;
পূৰ্ব্ব-তোরণে ডঙ্কা পড়িল, আসিছে হুৰ্য্যোধন ।

—বীর অর্জুন—বীর বটে মানি,—বুঝি মোরই সহোদর !
জীবনের ভার সঁপি' গেল তা'র মাতা যে আমারি 'পর ;
—সেই সে কুন্তী—আমারও জননী !
জ্যেষ্ঠ পুত্রে শ্রেষ্ঠ সে গনি'

পার্থের প্রাণ ভিক্ষা মাগিল জোড় করি' ছ'টি কর,—
হোক বীর, তবু গাণ্ডীবী মোরই কনিষ্ঠ সহোদর ।

কর্ণ

মনে-মনে মাতা অর্জুনে জানি' দুর্বল মোর কাছে,
দূর করি' তা'র রাণীর গর্ব তবে তো সে আসিয়াছে !

যা' চেয়ে নারীর নাহি কলঙ্ক,

যা'র বেশী তা'র নাহি আতঙ্ক—

মাতা হয়ে, হায় ! প্রকাশিয়া তাই, কৃপা মোর যাচিয়াছে,—
দুর্বলতার সব কথা কহি' স্মৃতপুত্রের কাছে !

—হায় রে, বিধাতা, কি দারুণ লিপি লিখিলি কর্ণ-ভালে !
স্মর-নরে কেবা কোথা পড়িয়াছে হেন সঙ্কট-জালে ?

এক দিকে কাঁদে মায়ের মিনতি,

আর দিকে বাঁধে বন্ধু-বিনতি—

যে বন্ধু মোর অনন্তগতি আশ্রয় ইহকালে :
ভাগ্য-বিধাতা, এ কি সঙ্কট লিখিলি কর্ণ-ভালে !

*

*

*

*

প্রভাতিলা নিশি কুরুক্ষেত্রে, পূর্ব-তোরণপারে,
যুদ্ধের কাড়া ফিরে' দিল সাড়া মিশি' নব হাহাকারে !

সারা রজনীর অনিদ্রাশেষে

ভীষণ ভ্রুকুটি ভরি' ভাল-দেশে

নমিলা কর্ণ সূর্যোদ্যেগে চাহি' পূর্বাশাপারে ;
প্রভাতিলা নিশি কুরুক্ষেত্রে, পূর্ব-শিবিরদ্বারে ।

—হে জবাকুসুমসঙ্কাসছাতি, হে সবিতা ! লহ নতি,
এ চিন্তভার নাশো আজিকার হানি' ও বরজ্যোতি !

পার্থ-কীর্ত্তি করিব বিজয়—

তব কাছে আজি প্রার্থনা নয়,

কর্ণের বাহু রক্ষিতে জানে আপনার সদগতি ;
এ আঁধারে শুধু পন্থা দেখাও, চরণে জানাই নতি ।

মহাভারতী

কুন্তী জননী, পার্থ সোদর—করিমু অশ্বীকার ;
মোরই 'পরে আজি অনন্তোপায় দুর্ঘোষনের ভার ।

রাজ্য ও মান যে-বা দিল দীনে,
তা'রে ছাড়ি' যাব হেন ছদ্দিনে ?
কৃতজ্ঞতার প্রতিদান ভুলি' দাতা হবে হরাচার !—
দুর্ঘোষনের আশ্রয় সে কি করিবে অশ্বীকার ?

না, না—তা' হবে না, পাণ্ডবে মোরে বধিতেই আজি হবে ;
ভুবনে সে মোর প্রতিদ্বন্দ্বী—ত্রিলোকে জানে তা' হবে !

দুর্শ্মদ তা'র জয়ের গর্ব
আজিকারই রণে করিব খর্ব,
পার্থ-কীর্তি লুপ্ত করিয়া ফিরিব মগৌরবে ;—
অর্জুন-বধে দুর্জয় খ্যাতি অর্জিতে আজই হবে ।

—আজ মনে পড়ে—রাজ-সভাতলে কৃষ্ণা-স্বয়ম্বর ;—
পার্শ্বের সেই অপমানে আজও জর্জর অন্তর !

কৌশলে জিনি' মংস্ত্র-চক্র,
মোর পানে চাহি' হাসিয়া বক্র,
ভুবনধন্য পাকালীধনে বরিল সে বর্ষর,—
আজ মনে পড়ে সেই বকনা—কৃষ্ণা-স্বয়ম্বর !

—সেই বকক—গাণ্ডীববলে, ভাগ্যের ফলে তা'র,
কৃষ্ণ-সারথি—দেখায় কর্ণে বীর্য-অহঙ্কার !

না থাক্ ভাগ্য, বীর্যেরই বলে
পাড়িব পার্শ্বে এই পদতলে,—
প্রতিজ্ঞা মোর এ ভূমণ্ডলে রোধিবে সাধ্য কা'র ?
পার্থ-ভাগ্য ব্যর্থ করিয়া প্রতিশোধ ল'ব তা'র ।

কর্ণ

—তবু, তবু মন বড় উচাটন মায়ের নয়ন-জলে,—
মাতা হয়ে স্মৃতে ভিন্কা মাগিল পড়িয়া চরণতলে !

যে কর্ণ কাছে কারো কোনো দিন
কোনো প্রার্থনা নহে ফলহীন,—

পুত্র হয়ে সে জননীর ঋণ শুধিবে কি বাহুবলে !
বীৰ্য্য তাহার কিসে পাবে পার মায়ের চোখের জলে ?

* * * * *
অঙ্গ-আগারে প্রবেশিলা বীর করিতে যুদ্ধ-সাজ ;
যুদ্ধশেষের শেষ সেনাপতি আজি সে অঙ্গরাজ ।

সহজাত ছ'টি হেম-কুণ্ডলে

সহজ কবচে রবি-কর ঝলে,

বাছি' বাছি' লয় সহস্র শর ভরি' শরাসনে আজ ;
হস্তে বিজয়, ললাটে দীপ্তি—সূর্য্যেরই মতো সাজ ।

—ওকি ! কা'র ছায়া উঠিল ফুটিয়া সমুখে মুকুর 'পরে ?
কর্ণ-জননী কুন্তী যে দেখি—নয়নে অশ্রু ঝরে !

পশ্চাতে ফিরি' হেরিলা চকিতে,—

কেহ তো কোথাও নাহি চারিভিতে ।

—এ কি মোহময় মহা বিষয় ! শিহরিলা কণতরে ;
মুকুরের মাঝে মিলাইল ছায়া আপন মুখের 'পরে !

—নয়, কভু নয়,—এহেন সময় নাহি চিন্তার ঠাই ;
বীৰ্য্যবৃন্তি কর্ণের মনে করুণার ক্লেদ নাই ।

সতেজ স্বাধীন চির-নির্ভয়,

কিণাকী কর জপে শুধু জয়,—

বিশ্বভুবনে পার্থ-গরিমা নির্জিত আজই চাই—
বীৰ্য্যবৃন্তি কর্ণ-চিন্তে করুণার নাহি ঠাই !

* * * * *

মহাভারতী

দুর্শ্মদ বেগে বাহিরিলা বীর পশিতে দীপ্ত রথে,
—কে রে ভিক্ষুক, আসিয়া দাঁড়ালি আগলি' মধ্য-পথে ?

—“হে বিশ্বজিৎ, হে দাতাকর্ণ,
কৃপার্থী কর চাহে সুবর্ণ-

-কুণ্ডল আর কবচ তোমার,—দেহ দান গৃহাগতে ।”
—আজানা ভিখারী, সহসা আসিয়া দাঁড়া'ল মধ্য-পথে !

থমকি' থামিল কর্ণ—শুনি' সে অদ্ভুত প্রার্থনা ;
—হায় রে, দৈব !—এই শেষ দিনে—এ কি রে বিড়ম্বনা !

প্রতিজ্ঞা ছিল ভিক্ষা-পূরণ,—
সে মহা-সত্য জানে ত্রিভুবন,

সেই অপরাধে ভাগ্য কখন করিয়াছে মন্ত্রণা—
পার্থবিজয় ব্যর্থ করিবে——হায় রে বিড়ম্বনা !

ভিক্ষুবেশী ব্রাহ্মণ পুনঃ কহে মিনতির স্বরে,—
“কর্ণ কি তবে সত্যে হানিবে আপন ধনুঃশরে ?

প্রার্থনা মোর ফিরিয়া জানাই,
পূর্ণ না করো, বলো—‘ফিরে’ যাই,
দাতা কর্ণের মিথ্যা বড়াই বুঝি' ল'য়ে অন্তরে”
ব্রাহ্মণবেশী ভিক্ষুক পুনঃ কহিল তীক্ষ্ণ স্বরে ।

কবচের সাথে কুণ্ডল বীর ছিঁড়িতে কঠিন হাতে—
আকর্ণ ভরি' অদ্ভুত হাসি দেখা দিলা অজ্ঞাতে !

মনে মনে ভাবে—এই তো সুযোগ,—
স্বর্গে মর্ত্যে যেথা অভিযোগ,
শক্তি সেখানে শুধু দুর্ভোগ অমোঘ ভাগ্য-হাতে !
কর্ণের মুখে অদ্ভুত হাসি দেখা দিলা অজ্ঞাতে ।

কর্ণ

—এই তো—এই তো সূর্যালোকিত মোরই প্রার্থিত পথ,—
ভাগ্যের বরে সার্থক হোক কুন্তীর মনোরথ !

বাঁচুক পার্থ—জ্যেষ্ঠ তো আমি,
শোণিতের সাথে কল্যাণকামী,—

যে স্নেহ-নিঝর অন্তরগামী, রোধে না তা' পর্বত !
সম্মুখে মোর এই তো পেয়েছি শান্তির মহাপথ !

—জননি কুন্তি, পুত্রের হাতে লহ প্রার্থিত দান,—
বঞ্চিত যেনা মাতৃস্বর্গে, সে আজি ত্যজিবে প্রাণ ।

আদেশ তোমার—‘বাঁচুক পার্থ’ !

—তাই হবে মাতা ; কর কুতার্থ
ভাগ্য-নিহত সূতপুত্রের বীর্যের অভিমান ;
জননি কুন্তি, পাণ্ডবমাতা, লহ তা'র শেষ দান ।

—চালাও শল্য, স্বরা লহ রথ—যেথা সে পার্থ আছে
শেষ প্রণিপাত লহ দিননাথ আজি কর্ণের কাছে ;

—সবই তো সমান—জয় পরাজয়—

অর্জুন-বধ—আত্ম-বিলয় !

—ভাগ্যের হাতে সবই অভিনয়—কর্ণ তা' বুঝিয়াছে ;

—চালাও শল্য—দ্রুত, দ্রুততর—পার্থ যেথায় আছে ।

দুর্যোধন

দূর দিগন্তে সন্ধ্যাসায়রে
 কালোয় মিলিছে রক্ত-রেখা ;
 নীচে নিৰ্জ্জনে প্রান্তর 'পরে
 কা'র ও-মূর্তি লুটিছে একা ?
 —কে আমি, জাননা ? ভুলিনি সে নাম—
 রাজা আমি—রাজা দুর্যোধন ;
 কুরুক্ষেত্র হয়েছে কি শেষ,—
 কোথা আমি,—এ কি দ্বৈপায়ন ?
 —মহিষি, মহিষি, রাণি ভানুমতি,
 কোথা গেলে সতি, দুঃসময় ?
 —রথ, মোর রথ—সারথি, সারথি,—
 কৈ, কোথা গেল রক্ষিচয় ?
 —উছ—বড় ব্যথা, দারুণ যাতনা—
 রাজবৈজ্ঞেয়ে কে আনে ডাকি' ?
 রাজার বীৰ্য্য, বীরের ধৈর্য্য—
 সেও আজি হা'র মানিবে নাকি !
 —তবু, তবু আমি করিনা শঙ্কা,
 একাকী যুঝিব নিৰ্ব্বিকার ;
 অধর্ম্ম-রণে পরাজয় তবু
 করিব সবলে অস্বীকার !
 * * * * *
 —হায় রে ভাগ্য ! তাও যে পারিনা,
 ভগ্ন এ উরু ধূলায় লুটে ;—
 আশ্রয়হারা বীৰ্য্য আমার
 হাহাকারে শুধু কাদিয়া উঠে ।

দুর্ঘোষন

—বৃকোদর, তুই পাণ্ডবগ্রানি,
 পাণ্ডুর গালে লেপিলি কালি,—
 চোরের মতন দহিলি ধর্ম্মে
 আপনার হাতে আগুন জ্বালি' !
 —ক্ষত্রবংশে অক্ষত্রিয়—
 বায়ুপুত্রেরই প্রমাণ ঠিক,—
 কলঙ্কী ঐ পাণ্ডবনামে
 ধিক্ ধিক্ তোর—শতেক ধিক্ ।
 —বিশ্বে কি কা'রও চক্ষু ছিল না !—
 হায় রে, বিশ্বে কেই-বা আছে ?
 ভীষ্ম দ্রোণ কর্ণ বিগত,—
 কে ল'বে শাস্তি কাহার কাছে ?
 —সবই সেই শঠ কৃষ্ণের কাজ,
 তুর চক্রীর কুমন্ত্রণা ;—
 'ধর্ম্মরাজ্য', 'ধর্ম্মরাজ্য'—
 মুখে যা'র বাণী-বিড়ম্বনা !
 —কৃষ্ণের সাথে দুষ্টের দল
 সখা বলি যা'র দাস্ত্র করে,
 যদুবংশের সেই কলঙ্ক
 চালায় তাদেরই হাস্তভরে !
 —কোথা বলরাম উদার-বীৰ্য্য—
 শুভ্রোজ্জল রৈবতক ?
 কুলপাংশুল এই তা'র ভ্রাতা—
 পক্ষপাতী এ প্রবঞ্চক !

মহাভারতী

—উছ—সেই ব্যথা, আবার, আবার !

—কে ও ? কাছে এস, হে সঞ্জয়,
ছুজ্জয় তব ছুর্যোধনের
হের এই দশা-বিপর্যয় !

—কুরুকুল,—সে কি নির্মূল তবে,—
কুরুক্ষেত্র ধ্বংস নাকি ?
বলো না মন্ত্রী, নিশ্চূপ কেন ?
বুঝিবার আর আছে কি বাকী !

—ভাবিতেছ মনে, ছুর্যোধনের
শুনাবে না সেই অশুভ কথা,—
হায়, তাত ! এই মৃত্যুর কূলে
আছে তা'র কোনো সার্থকতা ?

—আজ মনে পড়ে—সেই সভাগৃহে
পিতৃব্যের যুক্তপানি,—
এদিনের কথা সেদিন বুঝিলে,
কহি তাঁরে সেই তিক্ত-বাণী ?

—রাজবংশের সম্ভ্রম চাহি'
তবু কোনো তাপ নাহি এ মনে,—
ছুর্যোধনের মর্যাদাবোধ
কে না জানে তা'র শত্রুজনে ?

—ধর্ম তাহার—কর্ম তাহার
রাজ-রাজেন্দ্র-যোগ্য সবই,—
মানী পেত মান, গুণী আহ্বান,
অর্থী ফিরিত অর্থ লভি' ।

দুর্যোধন

—ওহো, সেই কথা ? দ্যুত-ক্রীড়ার
 ক্ষত্রাধিকার বিদিত লোকে,—
 কে বলিবে পাপ ? কোনো অন্ততাপ-
 -বাস্প তা' লাগি' নাহি এ চোখে !
 —হিংসায় যদি গণ' অপরাধ ?
 কাপুরুষ তুমি ;—সাক্ষ্য তা'র—
 দেবতা-দৈত্যে নিত্য বিরোধ,
 জ্ঞাতি হয়ে—কিবা বাক্য আর ?
 —হিংসা ! জীবের সহজ ধর্ম—
 হিংসা-অগ্নে পুষ্ট প্রাণ,—
 ধ্বংসে যে ছায়া কালের কাম্য,
 বংশে তাহাই মূর্তিমান !

—পাঞ্চালী-কথা ?—তুলোনা মন্ত্রি !—
 পঞ্চপতি যে ভজনা করে,
 যৌতুকসম কৌতুকে তা'র
 চির-অধিকার বিধির বরে !
 —রাজার ধর্ম—সে যে গুরুতর,
 কামের কামনা তাহার নয়,—
 সারা জীবনের সে একনিষ্ঠা
 তুমি জানো তাত, হে সঞ্জয় ।
 —কুন্তীতনয়, দ্রৌপদীপতি—
 কি নির্যাতন কঠিন তা'র ?
 কুরুকুলপতি—রাজ্যে তাহার
 সমদর্শী সে—বজ্রসার !

মহাভারতী

—সূচ্যত্রের ভূমি দিই নাই

পাওবে ?—সে কি কুপণ বলে' ?

দুর্যোধনের উদার হস্ত

কে না জানে এই পৃথ্বীতলে !

—তা' নয় মন্ত্ৰি,—ত্বায়ের দাবীতে

অধিকার চাহে শক্রগণ !

প্রার্থনা হ'লে ?—রাজ্য বিলায়ে

বনে চলে' যেত দুর্যোধন ।

—শুধু এক কথা—পারিনি ভুলিতে,

মন্ত্ৰি,—যা' আজও বি'ধিছে মনে, —

অভিমন্ত্যর হীন হত্যা সে—

সপ্তরথীর আক্রমণে !

—উছ, সেই ব্যথা ! উরু হ'তে উঠি'

মস্তকে পশি' ভুলায় সব !

অন্ধ নয়ন, ক্ষিপ্ত এ মন,

কর্ণে পশিছে প্রলয়-রব !

—মন্ত্ৰি, মন্ত্ৰি—সব ছেড়ে গেছে ?—

বৈজ্ঞ কেহ কি নাহিক আর ?

—সংবাদ দাও, ডাকাও, ডাকাও—

এ কণ্ঠহার পুরস্কার ।

উর্দ্ধ আকাশে সন্ধ্যা ঘনায়

প্রান্তরশিরে বনের পারে,

দূরে হৃদজল কালো হয়ে আসে

ঘন ঘনায়িত অন্ধকারে !

দুর্ঘোষন

কুরুক্ষেত্র-প্রাস্তুর ভরি'
 'অলে' উঠে শত আলেয়া-আঁখি ;
 নিশাচর যত হিংস্র স্বাপদ
 ছঙ্কার দিয়া ফিরিছে ডাকি' !

—সঞ্জয়, তুমি রহ ক্ষণকাল,
 হয়-তো এ মোর শেষের রাত্তি !—
 জয়-পরাজয়—প্রশ্ন সে নয়,
 জানি, তা' জীবের জীবনসাথী ।
 কোনো ক্ষোভ মোর নাহি এ জীবনে,
 স্বভাব-রাজা এ দুর্ঘোষন ;
 নিন্দা-খ্যাতির উর্দ্ধে তাহার
 সর্বশাসন সিংহাসন !

—শত প্রণিপাত জানাইও শুধু
 পিতার চরণে মল্লিবর,—
 ব'লো—আমি সেই মহৎ পিতার
 মহিমাবিত বংশধর ।
 মৃত্যুরে আমি সহজ গর্বে
 নিত্যকালের ভূত্য গণি,—
 হরে সে জীবন, পারে না হরিতে
 কীৰ্ত্তি—যা' তা'র চিরন্তননী ।

—হউক পিতার নয়ন অন্ধ—
 ভাগ্যের হাতে কি-বা না হয় ?
 পুত্রের 'পরে জানি স্নেহ তাঁর
 অপার, তবু সে অন্ধ নয় !

মহাভারতী

—সন্তান লাগি' মঙ্গল মাগি'
 রাজ-শাসনের নিগড়ে বাঁধি'
 যুদ্ধের পথে লৌকিক মতে
 পারিতেন তিনি হইতে বাদী ;
 —মহুদাতার অভাব ছিল না,
 —কৃষ্ণ, বিহুর, ভীষ্মবীর,—
 পুত্রের 'পরে বিশ্বাসে তবু
 শ্রদ্ধানত সে উচ্চ শির !
 —কাপুরুষতার শাস্তি হইতে
 সংগ্রামও শ্রেয় নিত্যকাল,—
 পুত্রস্নেহে সে রাজধর্ম
 ভুলেননি সেই পৃথ্বীপাল ।
 —মানী পুত্রের মান্য পিতা যে—
 মনঃচক্রে দিব্য জ্যোতি ;—
 চরণে তাঁহার তাই বারবার
 দেহ-মনে আজি জানাই নতি ।
 রাত্রি ঘনায়,—বন্ধু, বিদায়,
 ফিরে' যাও ঘরে প্রণাম ল'য়ে ;
 হৃষ্যোধনের দৃপ্ত মহিমা
 জাগুক শিয়রে সঙ্গী হয়ে !
 বেদব্যাসের পুতনাম-যুত
 ছলুক অদূরে দ্বৈপায়ন ;—
 ক্ষত্র তেজের দীপ্ত তারকা
 অলুক আধারে হৃষ্যোধন !

ভীম

সুবিরাট বরনেহে বর্ণ তব কবিত কাঞ্চন ;
 বিপুল বাহুর শক্তি প্রচ্ছন্ন প্রমত্ত প্রভঞ্জন,
 আনত আপন বীর্যো ; সর্জসম দৃপ্ত সরলতা
 জানায় নিখিল চক্ষে দূর হ'তে বলিষ্ঠ বারতা ।
 একাধারে ভীমকান্ত—দেহমনে ভীষণ-সুন্দর—
 প্রগতি তোমার পদে, হে পাণ্ডবশ্রেষ্ঠ বৃকোদর !

বলরাম-শিষ্য তুমি, গুরুধর্ম লেখা তব ভালে ;
 অসত্য-সর্পিল পথে চলো নাই কভু কোনো কালে ।
 হোক জ্যেষ্ঠ, হোক শ্রেষ্ঠ,—হোক কৃষ্ণ—একান্ত আশ্রয়,—
 সহজ সত্যের বলে মুহূর্ত করনি কা'রো ভয়,
 কভু কোনো ছঃখদিনে ; সাক্ষ্য তার, কৌরব-সভায়
 রক্তের অঙ্করে লেখা—হৃষ্টের শাসন-প্রতিজ্ঞায় !

যষ্ঠ দিবসের যুদ্ধে, ভীষ্ম যবে ক্ষুর অভিমানে,
 পুরিলা অব্যর্থ ধনু মন্ত্রঃপূত নারায়ণ-বাণে—
 ত্রিলোক-সংহার-শক্তি,—কোথা ছিল অর্জুন তখন—
 অক্ষত্র ক্লীবের মত করি' নিজ পৃষ্ঠ প্রদর্শন
 কৃষ্ণের নয়নে চাহি' ?—একা তুমি রহি' অস্ত্রপাণি
 পালিলে প্রতিজ্ঞাধর্ম, কৃষ্ণ চেয়ে সত্যে বড় মানি' ।

বিশ্ব জানে,—তবু কেবা তোমা সম সেবে গুরুজনে !—
 শক্তিতে বাঁধিয়া ভক্তি সুসংযত সত্যের শাসনে ।
 আত্মপ্রত্যয়ের বলে ভূজি' বিষ আত্মীয়ের হাতে,
 মৃত্যুরে যুঝেছ তুমি মুখামুখী কৌতুকের সাথে,—
 আপন স্বচ্ছন্দ বীর্যো ; গদা রাখি' অগ্রজের পদে
 সরল শিশুরই মত সেবিয়াছ সম্পদে-বিপদে ।

মহাভারত

অকৃত্রিম প্রেম যেথা, টলিয়াছে অটল হৃদয় ;—
ভুলিয়াছ আভিজাত্য ; বেদনারে দিয়াছ আশ্রয়
অক্ষুণ্ণ অন্তর-ধর্ম্মে ;—রাক্ষসীর ব্যগ্র আলিঙ্গনে
সাগ্রহে দিয়াছ ধরা ; আশ্রিতের আর্ন্ত আবেদনে
অকুণ্ঠিত ক্ষাত্রবীর্য্যে সঁপিয়াছ আত্ম-প্রতিদান—
কেবা উচ্চ, কেবা নীচ—গণনি সমান-অসমান ।

মোহান্ন দেখেছি পার্থে, লোভান্ন আচার্য্যশ্রেষ্ঠ দ্রোণে,
মদান্ন দেখেছি কর্ণে, মানান্ন রাজেন্দ্র দুর্ঘ্যোধনে ;
তোমার মন্ততা যবে চোখে পড়ে—হেরি হতাশন ;—
দারুণ সে দীপ্ত বহি—ক্ষাত্রবীর্য্যে শত্রুর শাসন—
অধর্ম্ম-নিধন-বজ্র—প্রজ্জ্বলিত আপনার তেজে ;
দগ্ধ করে, দীর্ণ করে, চূর্ণ করে ছুঁটদলে সে যে !

তবু হায় ! কত স্নেহ,—সে কি প্রেম সর্ব্বজন 'পরে !
উদার বীরের ধর্ম্ম স্বার্থত্যাগে আর্ন্তসেবা তরে
হেলায় সঁপিতে চাহে আত্মপ্রাণ রাক্ষসের হাতে ;—
বিস্মিত পাপিষ্ঠ বক—শেষ দৃষ্টি মুদে সে শ্রদ্ধাতে !
মধ্যম যে জ্যেষ্ঠ-শ্রেষ্ঠ, কনিষ্ঠের গরিষ্ঠ সে গুণে ;—
দধীচি শিহরে স্বর্গে মর্ত্যের অপূর্ব্ব বার্তা শুনে' ।

অক্ষয় বীরের বংশে বীরশ্রেষ্ঠ তুমি বৃকোদর,
অক্ষয় ত্যাগের গোত্রে ত্যাগিশ্রেষ্ঠ দ্বিতীয় শঙ্কর—
আত্মভোলা আশুতোষ ! রুষ্টি তুষ্টি সবই সে সরল ;
সত্যসম শুভমূর্ত্তি—তুল্য যা'র অমৃত গরল !
মানবের মহত্বের পারাবারে তুমি শেষ পার—
ভীমকান্থ হে সুন্দর ! পুনশ্চ তোমাতে নমস্কার ।

শবরীর প্রতীক্ষা

পম্পাসরোবরতীরে সূর্য্যদেব অস্ত যান ধীরে,—
 বুলা'য়ে আরক্ত কর ক্রান্ত তপ্ত ধরণীর শিরে,
 শাস্তির আশিসে ভরি'। ধূসর তরল অন্ধকারে
 ছেয়ে আসে জল-স্থল-অন্তরীক্ষ অম্পষ্ট আকারে।
 চাহিয়া ঈর্ষ্যার দৃষ্টি ফুটমান কুমুদের পানে,
 পরিপাণ্ডু পদ্মদল মুদে আঁখি রুদ্ধ অভিমানে !
 তীরাস্তৃত শৈবালের শ্যামায়িত স্বচ্ছ অবকাশে
 হংসকারণবদলে বিজ্রামের সাড়া পড়ে' আসে—
 আতৃপ্ত গদগদ কণ্ঠে, বিধুনিত সিক্ত পক্ষপুটে ;
 শম্পগন্ধে বিলিচ্ছন্দে সন্ধ্যাকাশ পূর্ণ হয়ে উঠে।

মতঙ্গের তপোবনে সাক্ষ্য হোম হ'য়ে এল শেষ
 উদাত্ত গস্তীর মন্ত্রে ; ধীরে করি' নয়ন উন্মেষ
 চলিলা তপস্বিবর মন্দপদে ছাড়ি' দর্ভাসন,—
 যেথা দ্বারপ্রান্তদেশে নতজানু মুজ্রিত-নয়ন
 বসিয়া শ্রমণীবালা যুক্তকরে মৃত্তিকার 'পর ;
 —কহিলা উদার কণ্ঠে—বৎসে, আজি ল'ব অবসর
 এবারের জীবজন্মে, ত্যজি' দেহ সমাধি-আসনে।
 ইহজগতের চিন্তা কিছু আর নাহি আজি মনে,
 তোমার মঙ্গল ছাড়া ; অনাথিনি শবর-কুমারি,
 আশ্রিত আশ্রমে মোর, জানি তুমি সত্যের ভিখারী।
 (ঈষৎ হাসিয়া)..... কি ভাবিছ মৌন মুখে ?

মহাভারতী

শবরী ।কি ভাবিব ? কিবা আছে আর ?

প্রভু, পিতা,—এ জগতে কি আমার আছে বা চিন্তার ?
সবই সুবিজ্ঞাত তব—চিন্তা, চেষ্টা, স্মরণ, মনন,—
যেদিন ও-পাদপদ্মে পতিতারে দিয়াছ শরণ
আপনার কন্ঠা বলি,—ইষ্টমন্ত্র সঁপি' তা'র কাণে,
আজন্ম-তুর্ভাগা এই গৃহহীন অনার্য্য-সন্তানে
পালিয়াছ শিষ্যরূপে পবিত্র এ তপোবনবাসে ।
...এক প্রশ্ন, তবু দেব, আজ্ঞা কর, মনে যাহা আসে,—
'কোন্ অপরাধে, প্রভু, অপরাধী আজি ও-চরণে,
হেন সুহৃৎসহ বাণী যা'র লাগি' শুনিবু শ্রবণে,—
মৃত্যুসম গণি যাহা !

মতঙ্গ ।অপরাধ ? নহে অপরাধ ।

—শান্ত হও, বৎসে, তুমি । অনর্থক না গণ' প্রমাদ
যথার্থ এ উক্তি শুনি' । চিন্ত তব পবিত্র নিশ্চল,
সর্বদোষস্পর্শহীন । তথাপি এ সঙ্কল্প নিশ্চল,—
তাজিব এ দেহবাস আপনারই অভিপ্রায়ক্রমে ;
বারম্বার বলিয়াছি,—মৃত্যুরে ভেব না শেষ, ভ্রমে ।
অনিত্য এ দেহমায়া । তোমাতে জানাই আশীর্ব্বাদ—
পূর্ণ হোক ইষ্ট তব, সিক্ত হোক সাধনার সাধ ।
সত্যের প্রতীক্ষা কর জীবনের অন্তিমভূতিমাঝে
নিষ্ঠায় বাধিয়া বন্ধ ।

শবরী । পিতা, পিতা, কিছু জানিনা যে—

কে দিবে আমারে স্থান ? কোথা যাব ছাড়ি' তপোবন ?

শবরীর প্রতীক্ষা

মতঙ্গ! বৎসে, এ আশ্রমভূমি তোমাতে করিছু সমর্পণ ;
 আজি হ'তে সর্ব কার্যে তোমাতে সম্পন্ন অধিকার ;
 —যোগ্য হস্তে, শুদ্ধ চিত্তে যদি তুমি পালো এই ভার,
 ধরি' তব সিদ্ধিরূপ, মর্ত্যে যিনি মূর্ত নারায়ণ,—
 সেই রামচন্দ্র তব আশ্রমে দিবেন দরশন ;
 স্পর্শে যার সঞ্জীবিত অভিশপ্ত অহল্যার প্রাণ,
 অস্পৃশ্য নিষাদে যিনি সখ্যে বাঁধি' বন্ধে দেন স্থান,
 অরণ্যের শাখামৃগ যার প্রেমে বন্ধু প্রিয়তম,—
 সেই রামচন্দ্র হেথা আসিবেন, শুন বাক্য মম ;
 প্রতীক্ষা করহ তাঁর ।...শিবমন্ত্ৰ,—আসন্ন সময় ।

(বীরপদে অন্তর্ধান)

শবরী । পিতা, পিতা ! (ভূমিতে অবলুপ্তিত প্রণাম ও উত্থান)

.....রামচন্দ্র, রামচন্দ্র ! সেই দয়াময় !—
 শবরীর এ আশ্রমে ? হেন ভাগ্য কবে হ'বে তার ?
 সাক্ষাৎ মিলিবে চক্ষে মর্ত্যরূপে জগৎ-পিতার ?
শান্ত হ' সন্দিগ্ধ মন ! মিথ্যা নহে মতঙ্গের বাণী,—
 সত্যদ্রষ্টা ঋষিকণ্ঠ অসত্য না কহে কভু, জানি ।
 —কি করিব ? কোথা যা'ব ? কি দিয়ে তুঝি দেবতারে ?
 কেন্ পথে, কোথা হ'তে, কেমনে সাক্ষাৎ পা'ব তাঁরে ?
 কি ফুলে গাঁথিব মালা ? কোন্ বর্ণ মানাইবে ভালো
 নবদুর্বাদলদেহে ? অবসিত দিবসের আলো—
 সন্ধ্যায় আসেন যদি ? হেরিতে সে বরমূর্ত্তিখানি
 কোন্ দীপ জ্বলাইব ? কালো হাতে কোন্ অর্ঘ্য আনি'
 কোথায় বসাব তাঁরে ? কি বলিয়া করিব আহ্বান ?
 —পাদস্পর্শ করিব কি ? অস্পৃশ্য যে ! তিনি ভগবান্ ।

মহাভারতী

কি ফল লাগিবে মিষ্ট ঐ মুখে ?—মহারাজ তিনি
ধরণীর শ্রেষ্ঠ বংশে ; ভোগ্য তাঁর চক্ষে নাহি চিনি !
—পিতা, পিতা, এ কি ভার দিয়ে গেলে অক্ষমার হাতে ?
আমি যে অযোগ্য তাঁর,—কীপে চিত্ত সন্দেহ-দোলাতে !

* * * * *
দিনে দিনে দিন যায়,—দিন যায় ;—রাত্রি যায় চলি' ;
মাসে মাসে বর্ষ যায়,—বর্ষ যায়,—আশার অঞ্জলি
শুকাইয়া উঠে হাতে—বেদনায়, বার্থ প্রতীক্ষায় ।
কৈশোর যৌবন ক্রমে,—ভরে দেহ পূর্ণ সুখমায়
অজ্ঞাতে অনবধানে ।—দিন যায় ।—রঘুপতি রাম—
কই তিনি ? কোথা তিনি ? হায়, দরিদ্রের মনস্কাম !

লতায় ফুটিল ফুল—সুরে সুরে, স্তবকে স্তবকে ;
পরিপুষ্ট তনুবল্লী কমলে কাকনে কুরুবকে—
পূজার্থী প্রতিমা যেন ! প্রতীক্ষায় কাটে দীর্ঘ দিন ।
হৃদয়-নয়নানন্দ কবে আসি' হবেন আসীন
অতর্কিত অবসরে !—অনাদরে যদি যা'ন চলি',
মতঙ্গের তপোবনে অভ্যর্থনা মিলিল না বলি'—
অক্ষমার অপরাধে অবহেলা ভাবি' মনে-মনে !
ছি ছি ! মরি সে লজ্জায়,—শিহরি সে ভ্রষ্ট আচরণে ।

অপেক্ষার একাগ্রতা উগ্রতর করি' তাই চোখে,
বনবীথি-তলে তলে ফিরে বালা মুগ্ধ দিবালোকে,—
উচ্চকিত অমুক্ষণ ; তপস্তার কাল ব'য়ে যায় !
—আসিয়া থাকেন যদি অমৃত পথে, ভাবিয়া হরায়
আবার আশ্রমে আসে ! শয্যা রচি' কুসুম-পল্লবে
যাপে দীর্ঘ বিভাবরী পথ চেয়ে, বাঞ্ছিত বল্লভে !

শবরীর প্রতীকা

—কোথায় সে মীতাপতি, মূর্তিমান্ অখিলের স্বামী ?
অপেক্ষায় কাটে দিন ; অন্ধকার চক্ষে আসে নামি' ।
রামচন্দ্রহীন রাত্রি ঘন হয়ে ঘিরে তপোবনে,—
নিশিজাগরণমসী আঁকি' শুধু কলঙ্কী নয়নে !

দিন যায়, রাত্রি যায় ; দিনে-রাত্রে মাস যায় ঘুরে',
মাসে মাসে বর্ষ যায় ; বর্ষে বর্ষে যুগ আসে পূরে' ;—
রাঘবের নাহি দেখা,—আশ্রমে সে পদ নাহি পড়ে ।
আবর্তিত কালচক্র, শিশিরে বসন্তকান্তি ঝরে !
পুষ্পহীন লতামঞ্চ ; পক্ক ফলে আনত বিতান ;
শিথিল বন্ধনমূল,—শ্রীহীন মালঞ্চ ত্রিয়মাণ ;
খসে' পড়ে জীর্ণ পত্র ; বিগলিত লোল গ্রন্থিজাল,
—বার্দ্ধক্যের নামাবলী সর্বদাঙ্গ পুরায় মহাকাল !
ব্যর্থতায় ভগ্ন দেহ ; দীপ্ত দৃষ্টি আচ্ছন্ন নয়নে ;—
আশ্রমকুটীরপ্রান্তে শবরী তথাপি একমনে,
দৃষ্টি মেলি' পথপানে,—কখন্ যে আসিবেন রাম ;
জরায় চরণ পদ্ম ;—মুখে শুধু জপে তাই নাম !
সুসজ্জিত পাণ্ড অর্ঘ্য, সুবিন্যস্ত ফলমূলথারি
নারিকেলপাত্রপূর্ণ সমাচ্ছত সরোবর-বারি !

দিন রাত্রি, রাত্রি দিন—জাগরণে অথবা তন্দ্রায়—
কোন্ মুগ্ধ ক্ষণে যদি রামভদ্র এসে ফিরে' যায়
মন্দপদে !—মস্ত্রদ্রষ্টা মতঙ্গের বাণী অতর্কিত ;—
শুভ আগমন তাঁর ঘটিবেই,—জানি সে নিশ্চিত ;
—কিন্তু যদি প্রাণ যায় ! রাম, রাম,' কোশল্যানন্দন !
—দ্রুততর চলে জপ—এস এস থাকিতে জীবন ।

মহাভারতী

অবসন্ন দীর্ণ দেহ, অবশ অঙ্গুলি নাহি চলে ;
 —রাত্রি ভোর হয়ে আসে,—হাসে উষা উদয় অচলে !
 সূর্য্যবংশ-অবতংস,—এস এস সর্ব্বগুণাধার,
 এস হে করুণ কান্ত, এ পতিতে করহে উদ্ধার ।
 পম্পাসরোবরতীরে হাসে রবি কমললোচনে—
 আপনারই গোত্রমাঝে প্রমূর্ত্ত হেরিয়া নারায়ণে ।

—কার ঐ পদধ্বনি ?—কে আসে রে ?—আসে নাকি রাম ?
 —চরণ চলিতে নারে,—ঘন ঘন জপে আরো নাম !
 নাসায় পশিছে গন্ধ !—পদ্ম কি ফুটিল দুর্বাদলে ?
 —কই, কোথা প্রাণারাম ?—দৃষ্টি নয়নের জলে !

রামচন্দ্র । (মন্দপদে সম্মুখে আসিয়া)

—এই তো এসেছি আমি ; কোথা তুমি শবরী সুন্দরি,
 কে বলে পতিতা তুমি ? তুমি মোর মর্শ্ব-সহচরী !
 কুতার্থ আজিকে আমি তোমার বাঞ্ছিত দরশনে ;—
 দৃষ্টি যার সত্যসন্ধি, তারেই তো খুঁজি ত্রিভুবনে !

অশোক

ক্রুদ্ধ অশোক কলিঙ্গ রণে
 ঘেরিয়া দন্তপুর,
 অবরোধে ভরি' রচিল নগরী
 নব অন্তঃপুর !
 রুদ্ধ করিতে ক্ষুর জুয়ার
 পুরবাসী যবে আঁটিল ছুয়ার,
 ফুঁসিতে লাগিল শত্রুবাহিনী
 মৃত্যুপিপাসাতুর !

তিন মাস ধরি' মগধসৈন্য
 আগলি' রহিল দ্বার ;
 নগরবাহিরে বাহিরিয়া আসে—
 এহেন সাধ্য কা'র ?
 অসহ কষ্টে স্বেচ্ছাবন্দী—
 তবু চাহিল না করিতে সন্ধি,
 হেলার চক্ষে বিপক্ষদলে
 করিল অশ্বীকার !

দুর্গ-কবাট প্রতিজ্ঞাসম
 কিছুতে দিল না পথ,—
 বহ্যার মুখে শিলা-গাঁথা যেন
 হিমাদ্রি-পর্বত !
 ক্ষুর নৃপতি জলদভিমান
 গর্জি' উঠিল সিংহ-সমান—
 “সারা কলিঙ্গ করিয়া আশান
 পুরাইব মনোরথ ।”

মহাভারতী

দিকে দিকে ধেয়ে চলিল অমনি
 অসংখ্য সেনা তা'র ;
 কুষ্ঠাবিহীন লুষ্ঠনে উঠে
 ঘরে ঘরে হাহাকার !
 কোথায় শস্ত্র, কোথা সম্পদ—
 শূন্য হইল যত জনপদ ;
 চারিধারে বেড়ি' বিজয়ী সৈন্য
 সাধে শুধু সংহার !

রাজ্য জুড়িয়া রাত্রিদিবস
 শুধু হায় হায় রব ;
 শোণিতপঙ্কে সারা কলিঙ্গে
 প্রলয়ের তাণ্ডব !
 ভরি' উঠে দেশ হিংসার গানে ;
 শোনে তা' অশোক তৃপ্ত পরাণে,—
 যত শোনে কাণে, তত বেড়ে' উঠে
 বিজয়ের উৎসব !

—কিন্তু কে ঐ ?—দেখ' তো মস্তি—
 কিসের ভিক্ষা চায় ?
 চোখ ছ'টি ওর বড় সুন্দর,—
 বিহ্বল করুণায় !
 —বৌদ্ধ ভিক্ষু ?—আবার এখানে ?
 শুধাও—দেশের কি বারতা জানে ।
 নূতন তথ্য এলে সন্ধানে,
 ব্যর্থ না ফিরে' যায় ।

অশোক

—না, ও কিছু নয়—মিথ্যা সময়
লইও না সন্ন্যাসী ;
যুদ্ধাবসানে সংবাদ ল'য়ে
সাক্ষাৎ ক'রো আসি' ;
রক্তে রঙোন আজি এ গোধূলি,
শান্তির কথা রাখো তব তুলি' ;
—খাওয়া-পানীয় চাহ যদি, লহ,
থাকো যদি উপবাসী ।

—কি বুঝিবে তুমি, সংসারত্যাগী,
ভারতের সম্মান ?
দেশমাতা মোর শুধু কি জননী ?
—সে মোর মনঃপ্রাণ !
শক্তির মূল, মুক্তির আশ,
চক্ষের আলো, মর্মে'র শ্বাস,
ভারত আমার বিশ্বাসী বুকে
স্বর্গের সন্ধান !

—জানো কি, অশোক আত্ম-আত্মত
সেই ভারতের পায়ে ?
রক্ততিলক পরালো সে যারে
বলি দিয়া নিজ ভায়ে !
ছার কলিঙ্গ—কি ছার মেদিনী !
পাদপীঠে তার ত্রিজগৎ জিনি'
বিশ্বের রাণী চাহে সে করিতে
সাজাইয়া সেই মায়ে !

মহাভারতী

ফিরায়ে নয়ন, রাধাগুপ্তেরে
 আদেশ করিলা ডাকি'—
 পাটলিপুত্রে বার্তা পাঠাও
 লক্ষ সৈন্য লাগি' ;
 যেখানে যা' থাকে খণ্ডরাজ্য,
 জিনি' ভরি' তোল' এ সাম্রাজ্য,—
 আজি হ'তে জয় জপো নির্ভয়
 দিবসযামিনী জাগি' !

—দেখ তো মন্ত্রি,—ফিরে' গেল না কি
 সন্ন্যাসী খালি-হাতে ;—
 যাবার সময় কি যেন দেখিলু
 অদ্ভুত অ'খিপাতে !
 —কি বলিয়া গেল ?—শান্তির পথ
 করণায় ছাড়ি' জানে না জগৎ !
 কি বলিল শেবে ?—যুদ্ধের জয়
 মরে সে আত্মঘাতে !

* * * * *

সুদ্র নৃপতি তিন দিন ধরি'
 রহিল বিমনা হ'য়ে ;
 পারিষদদল আসে, ফিরে' যায়—
 যে যার বারতা ক'য়ে ;
 যুদ্ধ-সচিব কহি' সংবাদ
 মুখপানে চেয়ে গণে পরমাদ !
 রাধাগুপ্তের মন্ত্রণা—সেও
 ফিরে ব্যর্থতা ব'য়ে !

অশোক

২

সেদিন আকাশে মেঘ করেছিল,—
 দেবীতে ফুটিল তারা ;
 থেকে থেকে বয় এলোমেলা বায়—
 উদাসীন দিশাহারা !
 শিবিরবাহিরে প্রস্তুতাসনে
 সম্রাট একা ভাবে আনমনে,
 —ঐ যে উজ্জ্বল নীরব দৃষ্টি—
 অতি দূরে—ওরা কা'রা ?
 —মনে পড়ে' যায় সহসা প্রেয়সী
 মৃতি সুনন্দার—
 নির্বাসিতা সে সীতারই মতন,
 —ছঃসহ দুখভার !
 পত্নীরে যা'র হেন ব্যবহার—
 মাজে কি তাহার রাজ-অধিকার ?
 —ভারতের নামে এও কি রে তবে
 নিজেরই অহঙ্কার !
 —স্মৃত মহেন্দ্র, কণ্ঠা মিত্রা—
 একে একে তা'রা আসি'
 কলিঙ্গজয়ী রাজা অশোকের
 চক্ষে উঠিল ভাসি' !
 —রে আত্মঘাতী, ওরে উদাসীন,
 তোরি সন্তান—তা'রা আজি দীন !
 মৃত সম্রাট ! এই আদর্শে
 ভুলাবি জগৎবাসী ?

মহাভারতী

—মিথ্যা, মিথ্যা, সকলই মিথ্যা
 মিথ্যা উচ্চ নাম ;—
 দেশের ছলনে চাহিস সাধিতে
 আপন মনস্কাম !
 কে গাহিছে ঐ ?—“হে মুক্তিকামি,
 সন্ধ্যার ছায়া আসিতেছে নামি’
 লহ বুদ্ধের শাস্তির বাণী—
 আনন্দ-অভিরাম !”

৩

সপ্তাহ শেষে—সন্ধ্যা তখন—
 সূর্য্য অস্তে যায়,
 কালো জল আরো কালো হ’য়ে উঠে
 দূরে পুর-পরিথায় ;
 সারি’ অবরোধ-পরিদর্শন,
 মৌন নৃপতি—বিষন্ন মন,
 ধীরপদে আসি’ পশিলা শিবিরে—
 ভ্রমণক্রান্তকায় ।

ব্যস্ত-চরণে আনিল মন্ত্রী
 নব সংবাদ বহি’,—
 বাঙ্গলার রাজা—প্রজা বীরসেন
 হইয়াছে বিজোহী !
 কলিঙ্গরাজ সঁপি’ যা’র করে
 স্ত্রী কন্যায়—যে স্বয়ম্বরে,
 হেসে বলেছিল—শূত্র রাজার
 সেবাদাস আমি নহি !

অশোক

—সেই বীরসেন—করদ ভৃত্য—
 এহেন দর্প তার !
 —মুখের বাক্য সহসা রুদ্ধিল
 বাহিরের হুঙ্কার !
 কলকোলাহল বিদরে গগন,
 স্তনিত পৃথ্বী, ধ্বনিত পবন,—
 স্বরিতে বাহিরে আসিয়া অশোক
 নেহারিল চারিধার ।

রাত্রির ভালে লক্ষ মশালে
 চক্ষে পড়িল ধরা—
 পুরদ্বারের পুরোভাগভূমি
 অশ্বারোহীতে ভরা !
 বঙ্গভূমির তরবারি-আঁকা
 উর্দ্ধে ছলিছে সবুজ পতাকা !
 —ঐ বীরসেন—জ্যোতিষসম—
 শ্বেত উষ্ণীষ-পরা !

মশাল-আলোকে চমকিয়া চোখে
 উচ্ছ্রিত তরবার
 অপ্রস্তুত মগধসৈন্যে
 কাটি' চলে চারিধার ।
 ঘন ঘন উঠে বঙ্গের জয়,
 মূঢ় সেনাদলে হানি' বিষয়,
 নিজ বল ল'য়ে পঁহুছিল বীর
 যেথায় পুরদ্বার ।

মহাভারত

যন্ত্রচালিত দুর্গছয়ার

অমনি সে গেল খুলি',—

মস্ত্রে যেন বা চক্ষের ধনে

বন্ধে লইল তুলি' ;

অতি অপূর্ব রণকৌশলে

সুস্থিত করি' বিক্রমবলে

বীরসেন আজি শত্রুর চোখে

ছড়াইয়া দিল ধূলি !

ক্ষণেকের তরে অশোকের মনে

অলিয়া উঠিল রোষ ;

ধিকার হানি' স্বীয় আলক্ষে

জাগিল অসন্তোষ ।

ক্ষুদ্র করদ—এত তেজ তা'র !

এ হেন দস্ত—সম্মুখে কা'র ?

তথাপি ধন্য বীর্য্য তাহার—

নির্ভীক নির্দোষ !

কহিল মন্ত্রী—কৃতব্রতার

দিতে হ'বে প্রতিফল,—

কলিঙ্গসাথে বন্ধের মিল

ঘটাবে চোখের জল !

কহে সম্রাট—ঐ বীরদেহ—

বৈরতে নয়, বাঁধি' মমত্বে,

ভাবিতেছি মনে, সাধিব কেমনে

মগধের মঙ্গল ।

অশোক

শুধা'ল মন্ত্রী—এই কি শাস্তি
 বিশ্বাসঘাতকের ?
 উত্তর এল—ভাবিনি সে কথা—
 ভেবেছি বীরত্বের !
 ক্ষুণ্ণ মন্ত্রী ভাবে,—এ কি কথা !
 কোন্ পথে পা'ব মনের বারতা ?
 যুঁহু গস্তীরে রাজা কহে ধীরে—
 রাত্রি হয়েছে ঢের !

৪

অন্ধরাত্রে উদিল চন্দ্র
 দুর্গপ্রাকারপারে ;
 প্রেতের মতন শোভিছে শিবির
 আবছা অন্ধকারে ;
 গ্রহরী হাঁকিছে দণ্ডে দণ্ডে,
 ঘণ্টা বাজিছে কাংসকণ্ঠে ;
 একা সম্রাট স্তব্ধ বিরাট
 চাহি' ব্যোমপারাবারে !
 দূরে উঠে গান—“কেন মিছে, নর,
 দুঃখের ভার বহ ?
 মুক্তিসাগরে কর নির্বাণ
 বাসনা সুদুঃসহ ;
 প্রতি নিঃশ্বাসে দিন যে ফুরায়,
 ডাকো তা'রে—যে-বা যাতনা জুড়ায় :
 —প্রভু সুগতের ছ'টি রাঙা পায়
 লহ রে—শরণ লহ ।”

মহাভারতী

গান নয়, যেন কাঁদিছে করুণা
বেদনা-সাগরতীরে ;
স্তব্ধ বিমান, নিশীথের প্রাণ
গলিছে শিশিরনীরে !
রাজা অশোকের বজ্রবক্ষে—
মর্ম্মপুরীর কক্ষে কক্ষে,
ফিরে' ফিরে' করে পরশন তা'রি
বার-বার ধীরে-ধীরে !

৫

ছ'টি বংশর গেছে তারপর
কলিঙ্গ-রণ-ভূমে ;
জেগেছিল যারা বিশ্বামহারা,
ঘুমায় গভীর ঘুমে !
সম্রাট তা'র যজ্ঞের শেষে
বিজয়মালা পরিয়াছে কেশে ;
শবসাধনার শেষের আছতি
নির্ব্বাণ চিতাধূমে !

কলিঙ্গ শুধু পিঙ্গনয়নে
চাহিয়া উদ্ধপানে,—
মরুভূমি যেন নির্ম্মধাকাশে
দৃষ্টিশায়ক হানে !
মাঠে নাহি ঘাস, পাতা নাহি গাছে,
শূন্য পুরীতে মহামারী নাচে !
শ্রান্ত অশোক ঘুরিছে আপন
কীর্তির সন্ধানে !

অশোক

—ঐ সে কীৰ্ত্তি !—শূন্যভবনে

জননীর বাহুপাশে—

শবের বক্ষে—শিশু-কঙ্কাল

চুষিছে স্তন্য-আশে !

—কে বা তা'র কাছে তরুণী তাপসী

করণ নয়নে কাঁদিতেছে বসি' ?

—ঐ না মিত্রা—আপন পুত্রী—

শ্মশানসেবার বাসে !

—ঐ সে আবার !—অন্য পুরীতে

ভিন্ন মূর্ত্তিখানি !

থাকিতে জীবন, হিংস্র স্বাপদে

কা'রে করে টানাটানি ?

নিরন্ন দেহে নাহি কোনো বল,

কে পারে নিবারে ? সে আশা বিফল !

স্বাপদের চোখে পড়িল নৃপতি

নিজ অন্তরবাণী !

—ঐ আরবার !—মৌন নগরে

শূন্য প্রাসাদসারি ;

রিক্ত কক্ষে মুমূষু তা'র

চাহে পিপাসার বারি !

মুণ্ডিতশির শিশু-সন্ন্যাসী

ব্যস্ত ব্যাকুল জল দিল আসি',—

মূর্ত্তির পানে চাহিয়া অশোক

চিনিল কুমারে তা'রি !

মহাভারতী

দীর্ঘ ভ্রমণ শেষ নাহি হয়
কীর্তিতীর্থে আর ;
ঘুরে' ঘুরে' দেখে সম্রাট তার
নবজিত ভাণ্ডার !
খুঁজিয়া মন্ত্রী পশিল সেথায়,
কহে—মহারাজ, লগ্ন যে যায় !
এই বেলা জয় না করিলে নয়—
সুযোগ মিলেছে তা'র !

কাণে আসে গান—“রাজার পুত্র
ভিখারী সেজেছে আজ !
ছিল নররাজ, আজি বিশ্বের
মহারাজ-অধিরাজ !
সব মিছে, শুধু ছুঃখ সত্য—
জানিয়াছে সেই পরম তথ্য ;
সবার ছুঃখে, সবার বক্ষে
জাগিছে তাহারি কাজ !”

—হা হা করি' হাসি' কহিলা অশোক—
মন্ত্রী, আরো কি চাহ ?
আজিও তোমার মহানরমেধ
হ'ল না কি নির্বাহ !
শোনো—আমি নর, নহি নরপতি,
ঐ তো সমুখে দেহ দুর্গতি !
মন্ত্রী, কোথায় ফিরাবে আমারে ?
—হইয়াছে গৃহদাহ !

অশোক

—জননী ভারত, নূতন ছন্দে

এবারে গা'ব মা গান !

আর রাণী নহ, দেবী ক'রে আজি

দিব তোরে সম্মান ।

ভুলেনি অশোক অতীতের পণ,

রণজয়ে আর নাহি তা'র মন ;

ধর্মবিজয়ে জিনিয়া ভুবন—

চরণে করিবে দান ।

জয়-পরাজয়

কলিঙ্গরাজ পড়িয়াছে রণে
 শত্রুর অসিঘাতে ;
 আহত কুমার শত্রুদিত্য,
 --সেও ধরাশয়্যাত্তে !
 বাঙলার বীর বীরসেন ছাড়া
 বীর নাহি কেহ বাকী,—
 পড়িতে পড়িতে রয়ে গেছে যেন
 শেষরক্ষার রাখী !

গরজি' উঠিল মগধসৈন্য—
 জয়, অশোকের জয় !
 ঘুরিয়া ঘুরিয়া উঠিল সে ধ্বনি
 উর্দ্ধে—আকাশময় ।
 বীরসেন শুধু বারেক চাহিয়া
 দুর্গপ্রাকারপারে,
 বজ্রের মতো পড়িল আসিয়া
 মৃত্যুর পারাবারে !

কলিঙ্গসুতা কুমারী প্রজ্ঞা—
 বজ্রের ভাবী-বধু—
 শত্রুর মুখে কালকূট যেবা,
 মিত্রের বুকে মধু—

জয়-পরাজয়

পঞ্চহাজার সখীসঙ্গিনী

রণরঙ্গিনী সাজি'

ভ্রূগ হইতে দৃষ্টি-পুষ্প

বীরেরে বরিল আজি ।

শক্তিরও সীমা আছে রণভূমে ;

সহস্র অরি নাশি' ,

—সেই বীরসেন—বর্শা-আঘাতে

প্রাণ দিল শেষে হাসি' !

গর্জি' উঠিল আবার মগধ—

জয়, অশোকের জয় !

রমণীকণ্ঠে ঢাকিল সে ধ্বনি—

নয়—নয়, কভু নয় !

—নয়, নয়, নয়—ঝঙ্কারে ফিরে'

পঞ্চহাজার নারী !—

নহি পরাজিত—করি না স্বীকার

শত্রুর তরবারি !

—চণ্ড অশোক, ভণ্ড অশোক,

মিথ্যা জয়ের রাজা,

লহ আজি শিরে, ভ্রাতৃহত্যা,

নারীহন্তের সাজা !

—বলিতে বলিতে মুক্ত ছয়ারে

দৃপ্ত কুপাণ ল'য়ে,

অশ্বারোহণে কুমারী প্রজ্ঞা

আসিল বাহির হ'য়ে !

মহাভারতী

সঙ্গে তাহার পঞ্চহাজার

কলিঙ্গ-পুরবালা—

পঞ্চহাজার নাগিনীর মতো

উগারে গরল জ্বালা !

যে বজ্র-হিয়া টেলেনি কখনো

বিপদ-ঝঙ্কারমাঝে,

সিন্ধু হইতে শৈলে যাহার

বিজয়-দামামা বাজে ;

ভুলায়নি যা'রে রমণীর প্রেম,

ভুলায়নি যা'রে ভাই,

জয় ছাড়া যা'র চক্ষের আগে

দ্বিতীয় দৃষ্টি নাই ;

— সেই সম্রাট—হেরি' এই নব

রণরঙ্গিনী-রূপ,

চমকি' উঠিল বিষয়ে ভয়ে—

স্তুতিত নিশ্চুপ !

পলকের মাঝে সম্বরি' স্বীয়

প্রমত্ত সেনাদলে,

রণভঙ্গীতে বাহু-ইন্দ্রিতে,

উচ্ছে ফুকারি' বলে—

সাদ্র এ রণ, হে সৈন্যগণ !

ত্যাগ করো তরবারি ;

অশোকের অসি যুদ্ধে কখনো

বিন্দু করে না নারী !

জয়-পরাজয়

চিরজয়ী রণে—আজি সে জীবনে
প্রথম মানিল হার,
অস্ত্রের চেয়ে তীক্ষ্ণ জানি এ
নারীর তিরস্কার !

—এত কহি' বীর, অশ্ববাহিনী
প্রজ্ঞার সম্মুখে,
ত্যাগ করি' অসি নিরস্ত্র-হাতে
দাড়াইল হাসিমুখে ।

পঞ্চমে তা'র হাঁকিলা প্রজ্ঞা—
কাপুরুষ, অসি লহ,
রমণীর প্রতি হেন অবজ্ঞা
দশগুণ দুঃসহ !

পিতৃহত্যা, ভ্রাতৃহত্যা,
বৃশংস, জেনো তবু—
নিরস্ত্র জনে কলিঙ্গ-নারী
অস্ত্র হানে না কভু !
দশ্য, তোমার দুঃসহ অসি
তুলি' লহ শেষবার ;
নারীর হস্তে হোক সমাপ্তি
স্পর্ধিত হিংসার !

—প্রতিজ্ঞা করি' ছেড়েছি যে অসি,
আর না লইব তুলি'—
কহিলা অশোক—আশুক শাস্তি,
হেলিবে না অঙ্গুলি !

মহাভারতী

—ধূর্ত অশোক, ভাবিয়াছ মনে,
উদার কথার ছলে,
বিনা-রণে জিনি' রুদ্ধ এ পুরী
স্বংসিবে পলে-পলে ?

—নিজ হাতে দিহু উদ্ধারি' বন্ধ,
হানো তব তরবার ;
দস্তী অশোক মতাই চাহে
কঠিন দণ্ড তা'র ;

—হউক সে পাপী, মানুষ তবু সে—
দেখাবে বিশ্বে আজ,
বাক্য তাহার তেমনি কঠিন,
যেমনি কঠোর কাজ !

—পুরী অবরোধ ?—আজই ল'ব তুলি',
কথার ছল এ নহে ;
অশোক আজিকে হারিয়া বাঁচিল,—
মগধ-নৃপতি কহে ।

বাসবদন্তা

বাসবদন্তা, বাসনামন্তা
 বাসবদন্তা নারী !
 হে নয়নরমা কর মোরে ক্ষমা—
 তোমারে চিনিতে নারি ।
 মণিকাঞ্চন রতনভূষণ,
 বিচিত্র বেশবাস,
 অতৃপ্ত মন রূপ-যৌবন,
 অকুণ্ঠ অভিলাষ ;
 পুষ্পিত পাণি সুশ্রুত বাণী,
 কোতুকরস-ফাগ,
 নৃত্যললিত বাহুবলয়িত
 সঙ্গীত চিতরাগ ;
 কুঞ্জ-ভবন মঞ্জু পবন,
 গন্ধ-প্রদীপ-ভাতি,
 পুলকোচ্ছল ভুলোকোজ্জল
 উন্মদ মধুরাতি ;—
 বাসবদন্তা বিলাসমন্তা,
 বাসবদন্তা নারী !
 ক্ষমা কর অয়ি বিভ্রমময়ী—
 চিনিতে যদি না পারি ।

মহাভারতী

বাসবদত্তা বাসনমত্তা,

বাসবদত্তা নারী !

ক্রবীলাসময়ী ক্ষমা কর অরি,

যদি-না চিনিতে পারি ।

হৃদয় খেলায় বিলাসে হেলায়

জিনি' কত দেহমন,

বেদনার পারে হাসিয়া তাহারে

করেছ বিসর্জন !

কত আঁধি রাতে ছ'টি আঁধিপাতে

আলেয়ার আলো জ্বালি'

কত-না পথিকে ভুলায়ে বিদিকে

দিলে হাসি' করতালি !

রূপ-আসক্ত কত-না ভক্ত—

নিশীথ-সেবার সাথী.

সহি' অপমান সঁপিয়াছে প্রাণ

না পোহাতে মোহ-রাতি !

বাসবদত্তা রূপপ্রমত্তা,

বাসবদত্তা নারী !

ওগো মণিহার, সূত্র তোমার

ধরিবারে নাহি পারি ।

বাসবদত্তা

বাসবদত্তা

আসবদত্তা,

বাসবদত্তা নারী !

বহে হিমবায়, রাত্রি যে যায়—

তবু তো চিনিতে নারি ।

পূর্ব আকাশে অরুণ-আভাষে

ফুটিছে জবার হাস,

একে একে খুলে' পড়ে পদমূলে

তামসী নিশির বাস ;

অচেনা আলোকে পড়েছে কি চোখে

হেন কোনো রূপরাশি,—

যা'র মহিমায় ভুবন ভুলায়,

টলায় মুখের হাসি ?

—যে রূপের পাশে আঁখি মুদে' আসে,

খোলে হৃদয়ের দ্বার,—

মিছে মনে হয় যত পরিচয়.

গত সুখসস্তার !

বাসবদত্তা

প্রমোদদত্তা,

বাসবদত্তা নারী !

এ কি অপরূপ ! হেরি তব রূপ

চিনিয়া চিনিতে নারি !

মহাভারতী

বাসবদত্তা অপ্রমত্তা !

কবির মিনতি লহ,

স্বরূপ তোমার कह একবার—

তুমি কি সে-তুমি নহ ?

—কে সে সন্ন্যাসী ঐ বুকে আসি'

মেলিয়া আসন তাঁর,

গেরুয়া বরণে ছোপাইল মনে

করুণার অভিসার ?

ফুরায়েছে তব নিতি নব নব

প্রমোদোৎসব-রাতি,

কোথা কালিকার দীপমালিকার

দীপুশিখার বাতি ?

রুদ্ধ প্রাসাদে দ্রুত বিধাদে

একাকিনী কা'র লাগি'

নয়নের জলে প্রতি পলে পলে

যাপিছ যামিনী জাগি' ?

বাসবদত্তা বিমলসত্তা,

বাসবদত্তা নারী !

কে কবে কোথায় ধরা পড়ে, হায় !

বুঝিয়া বুঝিতে নারি ।

বাসবদত্তা

বাসবদত্তা

শুদ্ধসত্তা,

বাসবদত্তা নারী !

তমসার পারে লইতে তোমারে

এসেছে কি কাণ্ডারী ?

এল কি বুদ্ধ

পরমশুদ্ধ—

নৈরঞ্জনা-তীরে ?

ব্যথিত ক্লান্তে

ভীত ও ভ্রান্তে

বন্ধে লইতে ফিরে' !

—গৈরিক-বাস,

মুখে মধু হাস,

সুশাস্ত সমাহিত,

চিরব্যথাহারী

দুঃখপথচারী,

করুণামথিত চিত !

সকলের সাথে

দু'টি রাঙা হাতে

ধূলায় পাতি' আসন,

—সেই তথাগত, সে কি সমাগত—

শরণাগতশরণ ?

বাসবদত্তা

অমৃতসত্তা !

সত্যে করিয়া সাথী,

সে কমল-পায়ে

আপনা বিকায়ে

কাটিল কি দুঃখ-রাতি ?

কষ্টি-পরীক্ষা

দিন নাই, রাত্রি নাই—কাগজে কালিতে মাখামাখি—
 দেশ দেশ দেশ !
 দেশ কোথা, দেশ কা'র ? কা'রে এই ব্যর্থ ডাকাকাকি—
 অক্লান্ত অশেষ ?
 চিনিনা—জানিনা যা'রে, বুঝি নাই কভু কোনদিন
 যা'র মৌন ভাষা,
 অস্পৃশ্য যাহার ছায়া, তবু যা'রে রাখিয়া অধীন
 সাধি স্বার্থ-আশা ;
 সুখ দুঃখ দূরে থাক্, যাহার মমত্ব কোনো কালে
 পুষি নাই বৃকে—
 তা'রে ল'য়ে এই খেলা—জুয়াড়ীর অন্ধ-ত্রুড়া-জালে
 নির্লজ্জ কৌতুকে !
 যে কালি কাগজে মাখি, কলঙ্ক তাহার দশগুণ
 মাখিয়া ললাটে,
 ভাবি—নিজ জয়ধ্বজা উড়াইনু অক্ষয় নিপুণ,
 এই বিশ্ব-হাটে !

এত অন্ধ নহে বিশ্ব, বিশ্বাসিবে কভু কোনো কালে
 হেন পরিহাস,—
 পৌরুষবিহীন ক্রীবে বিরচিবে ধরিত্রীর ভালে
 স্বীয় ইতিহাস !

কষ্টি-পরীক্ষা

বীর্য্যশুদ্ধা বসুন্ধরা—বীর্য্যে শুধু করে অর্গ্যদান
 শ্রদ্ধামুগ্ধ চোখে,
 দেশে দেশে, যুগে যুগে বীর্য্যবান বিজয়-সম্মান
 লভে বিশ্বলোকে ।
 বলিষ্ঠ ত্যাগের শক্তি মনুষ্যদে বরি' একদিন
 পূজিল ব্রাহ্মণে,
 বলিষ্ঠ ভোগের শক্তি ক্ষাত্রবীর্য্যে বসালো স্বাধীন
 রাজ-সিংহাসনে ।
 অন্তঃসারশূন্য দন্ত—বাহিরে যা' করে আফালন
 স্বার্থ-কোলাহলে,
 যথার্থ শক্তির কাছে সে কেবল মুণ্ড-আভরণ
 চণ্ডিকার গলে !

খড়োৎ নহেক অগ্নি, যতই করুক বারম্বার
 দীপ্তি-অভিনয় ;
 —নগণ্য রাত্রির কীট, অন্ধকারে তুচ্ছতা তাহার
 দণ্ড ছ'য়ে লয় ।
 একবিন্দু দাব-বহ্নি মহারণ্যে করে ভস্মসাৎ
 খাণ্ডবের মত,
 সভয়ে পলায় প্রাণী লভি' রুদ্র সত্যের আঘাত—
 মৃত্যু বেত্রাহত !

মহাভারতী

এক বিন্দু প্রতাপের বজ্রতেজে মোগল-মহিমা
 ভয়ে কম্পমান,
 এক বিন্দু শিবাজীর শূরত্বের দিতে নারে সীমা
 সারা হিন্দুস্থান ;
 একফুঙ্কি ছত্রসাল বুন্দেলার ঝঙ্কাময় মেঘে
 জ্বালে যে বিদ্যুৎ,—
 সাম্রাজ্য ধ্বসিয়া পড়ে, শত্রু মিত্র পালায় উদ্বেগে
 হেরি' মৃত্যুদূত !

সেদিন গিয়াছে চলি'—আজি দেশ বচন-গম্বুজে
 আচ্ছন্ন আহত ;
 মহাশিব পড়ে' আছে পদতলে ত্রিনয়ন বুঁজে',
 শক্তি তদ্ভাগত !
 দুর্বল নারীর মত পরস্পরে হানাহানি করি'
 কলহে কুৎসায়,
 ঈর্ষ্যার কালিতে মোরা আপন কলঙ্ক তুলি ভরি'
 কাগজের গায় !
 হীন ক্ষুদ্র স্বার্থ লাগি' মমত্বেরে করি বলিদান
 দেশের চক্রে,
 ভায়ের লাঞ্ছনা করি, জননীর সাধি অপমান
 রহি' তাঁরি ঘরে ;

কষ্টি-পরীক্ষা

বাহিরে ঢকার নাদে আপনারে করি সে প্রচার—
 স্বদেশের নামে,
 বুঝি না—হাসিছে পৃথী বাতুলের দেখি' ব্যবহার,
 দক্ষিণে ও বামে !

ত্যাগের গৈরিক-সূত্রে প্রতিষ্ঠার পতাকা রচনা—
 ভুবনে বিদিত ;
 মরণের কষ্টিতলে যথার্থ নিষ্ঠার খাঁটি সোণা
 চির-পরীক্ষিত !
 শাস্ত্রত কালের কোলে এ সত্যের কভু কোনোদিন
 হয়নি ব্যত্যয়,
 প্রাণের সীমানা ছাড়ি' প্রেম তবে হ'য়েছে কঠিন—
 তাই সে অক্ষয় ।
 প্রেমহীন প্রাণহীন শক্তিহীন বাক্য যা'র বল,
 ভিক্ষা যা'র কাজ,
 বৃত্তি যা'র স্বার্থ-সন্ধি, কীর্তি যা'র সঙ্কীর্ণ কৌশল,
 দাস্ত্রে নাহি লাজ ;
 যা' খুসী বলুক কিম্বা যা' খুসী করুক অভিনয়,
 যথা-ইচ্ছা তা'র,
 দেশের সম্মান বলি' সে যেন না দেয় পরিচয়
 বিশ্বে আপনার ।

মহানন্দমঠ

গৃহে যা'র অগ্নি লাগে, সে যদি চাহিয়া শূন্যপানে,
 নির্ঝাণের ভার তা'র বাহু তুলি' সঁপি' ভগবানে
 উদ্ধাপানে চেয়ে থাকে—রোদনের অশ্রু-অন্তরালে,—
 সে ভিক্ষার কাম্যফল ভগবান কভু কোনো কালে
 অর্পিতে অক্ষম নিজে,—এত স্থান নাহি সে দয়ায় !
 কাপুরুষ যে নাস্তিক—আত্মার জঘন্য দীনতায়,
 অস্বীকার করে নিজ বীর্য্যবান প্রাণের ঠাকুরে,
 তা'র সে নিল্লজ্জ মূঢ় প্রার্থনার আত্মঘাতী সুরে
 ঘৃণায় ফিরান মুখ, কোথাও থাকেন যদি তিনি —
 সৃজনবৈচিত্র্যমাঝে অবাস্তিত বিঘাঙ্কুর চিনি' !

দারিদ্র্যে নাহিক ভয়, নাহি খেদ জরাজীর্ণতায়,
 মূঢ়তায় নাহি লজ্জা, নাহি ক্ষোভ বুদ্ধিহীনতায়,—
 হোক না মানুষ হীন স্বার্থ-অন্ধ বান্ধব-বিমুখ,
 ভাগ্যে তা'র নাই থাক্ সর্ব্ব-সমবেদনার সুখ ;—
 দেহে যদি বাহু থাকে, পক্ষাঘাতগ্রস্ত যাহা নয়,
 মর্শ্বমাঝে যদি তা'র অস্তিত্বের রক্তধারা বয়,
 আপন সম্মানে যদি কখনো সে বেসে থাকে ভালো,
 মাতৃস্নেহনেত্রপাতে জ্বলে থাকে অন্তরের আলো,
 তা'র সেই কৃপাভিক্ষা নহে শুধু অজ্ঞ-অপরাধ,—
 পাপের প্রমূর্ত্তি সে যে, ধর্ম্মের ধিক্কৃত প্রতিবাদ !

মহানন্দমঠ

আগুন লেগেছে ঘরে ;—তবু যা'রা নিশ্চেষ্ট অন্তরে,
তন্দ্রিত তমিস্রাতলে নেমে চলে সুষুপ্তির স্তরে,
তা'দের জাগাতে হবে মেঘাচ্ছন্ন কালরাত্রিকণে—
কঠোর বজ্রের রবে,—যুগধ্বংসী ঝঞ্ঝার তাড়নে !

হা মুগ্ধ ভারতবর্ষ ! ত্রিশকোটি-সন্তানজননি !
দীর্ঘ শতাব্দীর ঘুমে আজও কি মা, র'বে অচেতনই !
—শক্তি তব সুপ্ত, জ্ঞানি, আত্মহারা বিশ্বতীর জলে,
ধর্ম অবরুদ্ধধ্বাস সংস্কারের পঙ্কিল পবলে,
ক্ষয়ধীন আত্মগোত্র, ভেদভিন্ন গৃহ-পরিজন,
বাহিরের গুরুভারে মেরুদণ্ড বিচ্ছিন্নবন্ধন,
নিজগৃহে পরবাসী তোমারি কর্তৃত্বহীনতায়,
অভ্যাসের নাগপাশে বাড়ে যা'রা চিন্তাদীনতায়,
তোমারি স্নেহান্ন ক্রোড়ে,—শাসনগস্তীর কণ্ঠ তুলি'
তুমিই কি তাহাদের কোনোদিন ডাকিয়াছ তুলি' ?

সে দোষের শাস্তি বুঝি দিতেছেন নিজের ভগবান,
ঈর্ষার কণ্টকে হের শরশয্যা সারা হিন্দুস্থান ;
লক্ষ্মীর আবাসভূমি লক্ষ্মীছাড়া তাই—পরগেহ,
খণ্ডিত দুর্বলদলে পদাঘাত করিছে যে-কেহ !
তস্কর লুকা'য়ে ফিরে, হাসে দস্যু পূর্ণযোগ জ্ঞানি',
ঘরে ঘরে মহামারী নিরন্তর করিছে টানাটানি ;

মহাভারতী

—এও লেখা ছিল ভাগ্যে ! এও সহ্য হইয়াছে প্রাণে !
বৈধব্যের মহা শোকে মাতা যথা ছুঁত সন্তানে
দেখিয়া না দেখে চক্ষে, অভিমানে ফিরাইয়া মুখ,—
নিরাশার নির্ঘাতনে যতই ফাটুক তা'র বুক !

আজ যবে ঘরে ঘরে আগুন লেগেছে রাজ্যমাঝে,
শত্রু মিত্রে ভেদ নাই, দিশিদিশি আর্তধ্বনি বাজে,
বিগ্রহ খসিয়া পড়ে, ধূলিসাৎ মন্দিরের চূড়া,
অটালিকা-ভস্মরূপে মাটির কুটীরে করে গুঁড়া,
বিদীর্ণ মণ্ডপ ছাড়ি' আত্মিতেরা পলায় শ্মশানে,
এখনো কি রুদ্ধবাক্ রহিবে মা পূর্ব অভিমানে ?
আজ তুমি জাগো মা গো ! নাই—আর সময় যে নাই,
মূহূর্ত্তের দ্বিধামাঝে মহাবংশ পুড়ে' হ'ল ছাই !
লুপ্ত আজি ভাগীরথী, পারিবে কি কোনো ভগীরথ
উদ্ধারিতে ত্রিশকোটি সন্তানের ভাস্কর পর্বত !

ঐ যা'রা অবশিষ্ট মোহাবিষ্ট কাপুরুষদল—
শ্মশানের বহিধূমে মুছে আখি বেদনাবিহ্বল,
আজিকার দুর্গতির সর্বশেষ-সোপানের তলে—
তাহাদের ডাকো উচ্ছে—মিলনের মহামন্ত্রবলে
আত্মশক্তি-প্রতিষ্ঠায় ; ভগ্ন বক্ষে দাও নব আশা,
নির্বাক্ বিমুগ্ধ মুখে জাগাও মা জাগরণী-ভাষা ;
শান্তির সান্বনা দাও কলহের কুরুক্ষেত্রপারে,
ঐক্যসূত্রে গাঁথি' তোলা বিচ্ছিন্ন বিভিন্ন ক্ষুদ্রতারে ;

মহানন্দমঠ

দাও শক্তি, দাও ভক্তি, দাও প্রীতি ছর্ব্বলের বুক,
 ফুটাও প্রাণের দীপ্তি লাক্ষিতের মৃত্যুপাশ মুখে ।
 কহ ডাকি' বজ্রকণ্ঠে—‘উত্তীর্ণত নিবোধত’ মূঢ়—
 ছিন্নমস্তা বিচ্ছেদের আত্মঘাতী বেদনা নিগূঢ়
 জেনেছিস দিনশেষে ; আর কেন ? ঘরে ফিরে’ আয়,
 আপন ভূষাগ্নি বন্ধে জ্বলেছিস্ যা’দের হিংসায়—
 তা’রা তো’রি জ্ঞাতিগোত্র ; যে রক্ত তা’দের বন্ধোমাঝে—
 স্তব্ধ হ’য়ে শোন্ দেখি, মর্শ্বে তো’র তা’রি ধ্বনি বাজে !
 অন্তরে বাহিরে তো’র সর্ব্বনাশা যে আগুন জ্বলে,
 আপনি রুধিতে হবে কল্যাণভূয়িষ্ঠ বাহুবলে,
 একত্রে বাঁধিয়া বুক—সর্ব্বহারা এই দুঃখক্ষণে ;
 প্রসন্ন করিতে হবে রিষ্টিহরা দেব ছতাশনে ।

—কে ডাকে তোদের আজি—আয়, আয়, ওরে তোরা আয়,
 এখনো সময় আছে,—আয় ওরে, লগ্ন ব’য়ে যায় ;
 বিশ্বেরে আশ্রয় দিবে মিলনের যে অক্ষয় বট,
 তা’রি পাদমূলে আজি গেঁথে তোল্ মহানন্দমঠ ।

সমীরণ

হে সমীর, হে পবন, হে বিশ্বের পরম নিঃশ্বাস !
 শ্রদ্ধাভরে তোমাপরে ছ'দণ্ডের রাখিয়া বিশ্বাস,
 ধরণীর প্রান্ত হ'তে আজি তব পাঠাইনু স্তুতি—
 তব সুদক্ষিণ স্পর্শে পূর্ণ হোক প্রাণের আছতি ।
 অষ্টমূর্তি মহেশের শ্রেষ্ঠ মূর্তি তুমি প্রাণবায়ু—
 তুমি সৃষ্টি-আয়ু !

বারবার আজি বারম্বার
 তোমাতে জানাই নমস্কার ।

রাত্রিদিন-যুগ্মপক্ষ আলো-অন্ধকারে,
 বিধূনিত ব্যোমপারাবারে,
 তোমাতে করিয়া ভর সঞ্চালিছে, দেখাইয়া পথ,
 মহাকালরথ !
 সংখ্যাভীত জীবযাত্রী দলে দলে বাঁধি' হাতে হাতে
 চলে সাথে-সাথে ।

তোমাতে জানাই নমস্কার ।
 বারবার ওগো বারম্বার ।

সৃজনের কথা-গীতে তুমি চির-অফুরন্ত সুর—
 ভীমকান্ত উদার মধুর ;
 বিশ্ববাসীর রক্তে তুমি নিত্যবাণী,
 নব নব ভাবে রসে তরঙ্গিত সৃষ্টি তব চলিয়াছ টানি' ;
 কালের কালিন্দীতীরে তনুহীন অনন্ত কিশোর,
 মুরলী ভরিছ চিত্তচোর !

বারবার ওগো বারম্বার
 তোমাতে জানাই নমস্কার ।

সমীরণ

প্রভঞ্জনঝঙ্কারে কভু তব রুদ্র পদধ্বনি—

শঙ্করের জটাজুটে যেন-বা ভূজঙ্গগরজনি

শুনি মহাপ্রলয়ের সাঁঝে ;

মৃত্যুর ডম্বরু বাজে সৃজনের মহাসিন্ধুমাঝে—

হায়-হায়-হাহাকাঁরে ভরা !

চরাচর কেঁপে উঠে—শঙ্কাফুকন ত্রস্ত বসুন্ধরা ।

তোমাতে জানাই নমস্কার—

বার বার ওগো বারম্বার ।

ভক্তকর্ণে মন্ত্র তুমি, গুরুকণ্ঠে বাণী ;

হিংসার ছঙ্কারে তব কম্পাতুর শঙ্কিত পরাণী

মরণের নাভিস্বাস টানে ;

প্রেমের ঝঙ্কার পাশে তা'রি পাশে প্রেমিকের প্রাণে ;

জয়ের হুন্সুভি বাজে,—পংপং উড়িছে পতাকা,

সত্তাবিধবার কেশ ভূমিতে লুটায় ভস্মমাথা !

তোমাতে জানাই নমস্কার—

বারবার ওগো বারম্বার ।

জীবনের জন্মদাতা—পিতামাতা, আত্মীয় স্বজন,

আজি যা'রা স্বর্গবাসী, ধরণীর কাটিয়া বন্ধন,

মুহূর্তের দেখা আর মিলিবে না এ মর ধরায়,—

তা'দের স্মরণ করি' হব্যদান করি যা' শ্রদ্ধায়,

অগ্নিমুখে করিয়া বহন

তুমি তাই করো নিবেদন

উর্দ্ধলোকে,—ধরার অমূর্ত বার্তাবহ !

আমার প্রাণের অর্ঘ্য লহ ।

বারবার ওগো বারম্বার—

তোমাতে জানাই নমস্কার ।

মহাভারতী

নিজীব কুম্ভকুঞ্জে তুমি দেব, দক্ষিণ সমীর ;
সঞ্জীবনী পরশিয়া একদণ্ডে যৌবন-অধীর
করি' তোল' বক্ষ্যা রিক্ততায় ;
বর্ণগন্ধ মুক্তি-বেদনায়

দিকে দিকে উঠে শিহরিয়া,
ললিত লাবণ্যদল দেখা দেয় ভুবন ভরিয়া !
বারবার ওগো বারম্বার—
তোমাতে জানাই নমস্কার ।

ঘরে-ঘরে তোমা তরে দক্ষিণের বাতায়ন খোলা,
উড়ায়ে রঙ্গিন বাস বুকে-বুকে দিয়ে যাও দোলা,
অঞ্চল আকুলি' কোতূহলে ;
ফিস্ ফিস্ কাণে-কাণে প্রণয়ের রসমস্ত্র চলে !
কাঁপে চুল, কাঁপে ছল, কাঁপে ফুল কবরীবন্ধনে ;
মনোভব-মনোকথা মৃদুস্পর্শে বোঝ' মনে মনে !
তোমাতে জানাই নমস্কার—
বারবার ওগো বারম্বার ।

—উত্তরের ডাক আসে,—ভ্রূষাসে ছলাইয়া মাথা
ঝরে' পড়ে পীত পাণ্ডু পাতা
লতায়-লতায় গাছে-গাছে ;
শুক কাণ্ড শির তুলি' যোড়-হাতে দাঁড়াইয়া আছে,—
কখন ডাকিবে বলি' ছ'দণ্ডের অভিনয়-শেষে ;
আমিও তা'দেরি মতো আছি বসে' তোমারি উদ্দেশে ;
শেষবার—ওগো শেষবার
তোমাতে জানাই নমস্কার ।

প্রাচীনার প্রলাপ

পাঁচকুড়ি প্রায় বয়েস হ'ল, ক'-বছর বা বাকী—
 যমও পোড়া আমার মতন কালাই হ'ল নাকি !
 অষ্টপ্রহর খুঁড়ছি মাথা, ডাকছি এত তা'কে,
 তবু কি তা'র ছ'সু আছে এই হতভাগীর ডাকে ?
 পাঁচটা ছেলে পোড়ার মুখে নিয়েছে পর-পর,
 তবু বলে, হয়নি সময়—এখনো ঘর কর !
 —কিসের ঘর লা ? পাঁচ-পাঁচটা বেটার মত বেটা—
 পাড়ার লোকে মরুত ফেটে—যমের মুখে বোঁটা !
 স্বামী গেল, পুতুর গেল—একটা তো ঐ মেয়ে—
 তাও বিধবা—ফিরে' এলেন হাতের নোয়া খেয়ে !

—দাঁড়িয়ে কে ও ? বোঁমা নাকি ? এত ঠাটও জানো !
 আচ্ছা, কেন নিতি ঘরে পিণ্ডি টেনে আনো ?
 খুঁড়িয়ে হোক—ছেঁচড়িয়ে হোক, নড়তে যখন পারি,
 ঘরের মধ্যে রাশ্ গেলা'তে কি সাত-তাড়াতাড়ি ?
 —ঐ যে তখন, কথার পিঠে পারবে খোঁটা দিতে !—
 সব জানি লো,—জানিনেক জলবে কবে চিতে ।
 এবার যদি আনবে টেনে,—বেটার মুখে ছাই—
 বালাই বালাই—কি বলি আর কি বলতে বা যাঠি !
 —মাথা গেল, গতির গেল, গিয়েছে চোখ-কাণ—
 তবু পোড়া মরণ নাইরে, হায়রে ভগবান !

মহাভারতী

বিন্দি ছুঁড়ী এমন সময় কোথায় গেল আবার ?
 আড়াই পহর বেলা হ'ল—হুঁসু আছে তা'র খাবার !
 বৌ ক'টা যে খেটে ম'লো সকাল থেকে কাজে !
 হাত লাগিয়ে শেষ করে' তা নে না ননদ-ভাজে ;—
 তা' না, পাড়ায় মরবে ঘুরে' অষ্ট-প্রহর কাল,
 সাথে অমন দশা তোদের, সাথে বেরোয় গাল ?
 ঝেঁটা মারি কপালখানায়,—অমন খাসা বর,
 —সইবে কেন ? ছুঁটো বছর গেল কি পর-পর ?
 দিব্যি তাজা যোয়ান ছেলে, এক বয়সী বিধুর—
 কি কাল রোগেই ধরল এসে, ঘুচল সী'থের সিঁদূর !

মিলেছে তো বলেইছিলাম—কুষ্টিখানা মিলাও,
 —একটা মেয়ে, বুঝে'-সুঝে' পরের হাতে বিলাও,—
 শুন্লো না তো মাগীর কথা—শুন্বে কেন কাণে ?
 আপন লোকে পর হয়ে যায়, ভাগ্যি যেদিন টানে !
 বুঝলো শেষে, মেয়ে যখন ফিরল কেঁদে ঘরে,
 সেই থেকে আর হাসেননিক একটি দিনের তরে ;—
 ধন্দ হয়ে গেলেন যেন,—ফুড়ুক ফুড়ুক টান—
 তামাক নিয়েই কাটত সময়, য'দিন ছিল প্রাণ !
 —গেলেন যদি, আমার কেন নিলেননাক' সাথে ?
 আশী বছর এক সাথে ঘর—সহ্য হ'ল ধাতে !

প্রাচীনার প্রলাপ

—ভালোই গেছেন, আমার মতন পাপী তো আর নয়,—
 নইলে যা' সব ঘটল পরে—মানুষ পাথর হয় !
 —আবার কেন দাঁড়িয়ে বৌমা ? সবাই মিলে গিয়ে
 সেরে-সুরে' নেওনা হেঁসেল, মুখে যা-হোক দিয়ে ;—
 বেলার কি আর কসুর আছে ? রাড়ীভুঁড়ির বাড়ী—
 এঁটো-কাঁটা নিয়ে তখন লাগবে কাড়াকাড়ি !
 ঐখান্টায় থাকুনা পড়ে'—যখনই হোক উঠে',
 —আমার আবার ক্ষিদে-তেষ্টা ছিষ্টি গিলে'-কুটে' !
 তসরখানা সরিয়ে রাখো গঙ্গাজলের কাছে—
 আচার-বিচের শিখবে কবে—বয়েস কি আর আছে ?

—ফেল্লে ছুঁয়ে জপের মালা !—সাধ করে' কি রাগি ?
 বলব কত গুণের কথা—কি যে বেহুঁস্ মাগী !
 —বংশী আমার থাকুত বেঁচে, তা'কে দিয়েই আজ
 শিথিয়ে দিতাম কেমন করে' করে ঘরের কাজ ।
 —রাজার মতন ছেলে আমার, মুখের কিবা ছিরি,
 মায়ের উপর ছেদ্দা কত !—থাকুক বাবুগিরি—
 আমার কাছে কেঁচো হয়ে থাকুত, সবাই জানে,
 —সাধি ছিল চোখের সামনে তাকায় বৌ-এর পানে ?
 রৌতের জ্বালায় গেল তো সে—পাহাড় পড়ল খসে',
 —আর ঐ মাগী, আমার সঙ্গে পিণ্ডি গিল্ছেন বসে' !

মহাভারতী

শরৎ ছিল আরেক ধরণ—পাংলা তাঁরি মতো,
 ছিপ্‌ছপে তা'র গড়ন, তবু সাহস ছিল কতো !
 মামার বাড়ী যেতে সেবার—চণ্ডীতলার বিলে—
 ডাকাত পড়ে' গাড়ী যখন ঘিরল সবাই মিলে !
 —ঐ তো ছিল সঙ্গে সেবার, তাই তো পেলাম পার,
 নইলে কি আর রক্ষে ছিল—সাধ্য হ'ত কা'র ?
 আমি তো মা ভয়েই মরি—আকাট হয়ে প্রাণে,
 —কতই বয়েস ? কি করে' যে বাঁচালো, সেই জানে !
 অমন ছেলে—কি যে হ'ল কোন্ সাহেবের সাথে,
 বিদেশ-ভূঁয়ে প্রাণটা দিলে বে-ঘোরে কা'র হাতে ।

ওগো, তুমি কোথায় গেলে—একলা আমায় ফেলে,
 আশীর পারে এমন দাসী কোথায় আবার পেলে ?
 আমার উপর বিরাগ তোমার ছ'দিন টেঁকেনি তো,
 সেই আমি আজ তোমার কাছে নিমের মতন তিতো !
 পুরুষ হ'লেও এতো দিনের মন তো তোমার চিনি,
 তাই তো আজও আগের কথা সম্বন্ধে পারিনি ;—
 নইলে আমার বয়েই গেছে—এই ভরা-ছপুরে
 বাসি-মুখে তোমার কথায় মরতে অলে-পুড়ে' !
 —পুরুষ কখন আপন হয় লা ? শত্রুর চিরকাল,—
 কাটা ঘায়ে হুনের ছিটে—সগ্গে গেলেও ঝাল !

প্রাচীনীর প্রলাপ

—ওরে আমার সত্যবাদী ! বুঝি তা'রি ব্যথা ;
 কেন তখন বললে আমায় মন-ভুলানো কথা ?
 —ভুলে' গেছ ? সেই সেবারে—পক্ষু যেবার পেটে,
 তোমার সাথে বদ্দিনাথের তীখি যেতে হেঁটে,
 — বললে কত—তোমায় ছেড়ে কোথাও যাবনাকো ;
 তীখি-পথের বাক্যি আমার সত্যি ধরে' রাখো ।
 —রাখ'না তো, তোমায় আমি একলা দিব ছেড়ে,
 যমের সঙ্গে ফিসির-ফিসির দিচ্ছি এবার ঝেড়ে !
 ক্রান্ত-বাম্নি ভয় করে না, যমের বাবা এলে ;
 —ধম্মবাক্যি মিথ্যা হবে ?—যাওনা দেখি ফেলে !

—ওমা ! ঐ তো বাহির-দোরে দিচ্ছে কড়া নাড়া—
 পষ্ট কাণে শুন্তে পাচ্ছি, কস্তারি তো সাড়া !
 ওরে বিন্দি, ওগো বৌমা—ছয়োর খুলে' দে না—
 এত ডাকেও খল মাগীদের টনক কি নড়ছে না !
 পোড়ার-মুখী শতেক-খাকি—কাণের মাথা খেয়ে
 জটলা বেঁধে মরে' আছি—আমার দিকে চেয়ে !
 মরুক মরুক,—আমিই যাচ্ছি,—ধর' তো একটু তুলে',
 কি আর করি, নিজেই গিয়ে দিচ্ছি ছয়োর খুলে' ;
 —যাচ্ছি—যাচ্ছি—শ্মশানপুরে কেউ কি আছে তোমার ?
 ছয়োর খুলে' দিবে উঠে' ? মরণ শুধু আমার !

পড়ে'-বাড়ী

মস্ত একটা পড়ে'-বাড়ী—তিন প্রকোষ্ঠ, দোতারা ;
দক্ষিণে তা'র ফুলের বাগান, উত্তরে তা'র গোশালা ।
বাগিচা আজ কাঁটায় ভরা, নাইক গরু গোহালে,—
ছ'মণ ছধের যোগাড় হ'ত যেখানে রাত পোহালে !
পূব্ কোণের ঐ পুকুরধারে কল্মীদামের আড়ালে—
পৈঁঠাগুলোর হাড় ক'খানা দেখতে পা'বে দাঁড়ালে ।

পাঁচটা পুরুষ যায়নি আজো, এরি মধ্যে এই ব্যাপার ;—
লক্ষ্মী যখন ছেড়ে চলেন, এম্নিতর কাণ্ড তাঁ'র !
চক্‌মিলানো চতুঃশালায় লোক যেখানে ধরে না,
আজ সে বাড়ী শূন্য পড়ে', একটা কোণও ভরে না ।
পেটের জ্বালায় ছিটকে পালায় যেখান থেকে মালেকে,
সকাল বেলায় ঝাঁট কে বা দেয়, সন্ধ্যাদীপ বা জ্বালে কে ?

হানাবাড়ী—ভূতের বাড়ী—এম্নিতর রটনা—
পাড়া-গাঁয়ে এসব ক্ষেত্রে খুবই চলিত ঘটনা ;
চোর ছাড়া তাই মাড়ায়নাক' কেউ বড় আর সেদিকে,
জান্‌লা-ছয়োর খুলে' তা'রাই নেয় খুসী যা'র যেদিকে !
রাতভিতে তো সে পথ দিয়ে বিশেষ কেউ আর চলে না,—
এমনি হ'ল, গোঁসাই বাড়ীর নাম বড় কেউ বলে না ।

২

এই তো গেল বাড়ীর কথা,—আমল কথাই বলিনি—
একটি কেবল মেয়ে থাকে বাড়ীতে—নাম নলিনী ;
বংশে একা সেই শুধু আজ আঁকড়ে' পড়ে' ভিটাতে,
দেব্‌তা জানেন কি জন্তে বা কিসের আশা মিটাতে !
আপন ঝোঁকে আপ্নি থাকে, বয়েসখানা পূরন্ত,
পায় না খেতে,—অটল তবু হুঃসাহসী ছরন্ত !

পড়ো'-বাড়ী

একটিমাত্র বুড়ো চাকর, রাত্রিদিনের সঙ্গী সে,
কোনোমতে কাটায় জীবন গোহাল-বাড়ীর কোণ ঘিঁসে' ;
সব্জী লাগায়, তাইতে তা'দের বেচে'-কিনে' দিন কাটে,
ছ'জুন ছাড়া নেইক প্রাণী পড়ো'-বাড়ীর তল্লাটে,
আশের-পাশের পড়শী যা'রা,—কেউ বড় খোঁজ রাখে না ;
এরাও নিজে বেরোয়নাক', তা'রাও বড় ডাকে না ।

বিশেষ করে' ঐ মেয়েটির ভূত-নামানো-কথাতে
অনেকেরই আস্থা আছে পল্লীশুলভ প্রথাতে !
—নইলে কেন নিশীথ-রাতে বাড়ীর ছাতে দীপ জ্বলে ?
ছাতিম-ঘাটের চাতাল থেকে নজর সেথায় ঠিক চলে !
চাকরটা তো হদ্দ বোবা—হবে না আর ? হবেই তো ;
সে ছাড়া কি লোক জোটে না ? লোকে বলে—তবেই তো !

৩

এমন সময় গ্রামটিতে এক বাবু এলো ক'ল্‌কাতার,—
কলেজ-পড়া, মোটর-চড়া, মনের মধ্যে ডুক-সাঁতার !
সিংহী-বাড়ীর শ্যালাই বটে, ভাবনা-ভীতি নেই প্রাণে ;
প্রথম রাতেই ভূতের বাড়ীর খবর পেলেন সেইখানে ।
—'নষ্ট মেয়ের ঐ তো মজা—আমরা বাবা সব জানি,
রও না ছ'দিন, দিচ্ছি ভেঙে ধিঙ্গী মাগীর সয়তানি' !

কুকুর এবং শিকার নিয়ে কাটল ক'দিন জঙ্গলে,
ঘুঘু-মারার কতই তারিফ করল ইয়ারদঙ্গলে !
পুকুরপাড়ে ছিপ দিয়ে হয় মাছ ধরিবার ব্যবস্থা,—
ঘাটের পথে বৌ-ঝি-চলা বন্ধ হ'বার অবস্থা !
গোঁসাই-বাড়ীর আস-পাশে তো নেক-নজরের অন্ত নাই,
সকাল এবং সন্ধ্যা কাটে মানুষ-ধরার মন্তনায় !

মহাভারতী

রাত্রি কাটে সিং-বাবুদের বাগান-বাড়ী আনন্দে,
সঙ্গে যত সঙ্গী-ইয়ার—বিপিন দত্ত, কানন দে ।
চলছে যত নারীর কথা, চলছে আরো কত কি,—
সহরে সব রূপের ডালি—পারুল, চাঁপা, কেতকী !
—‘যাহোক্ বাবা, পাড়ারগায়ের পক্ষে, এটিও মন্দ না,—
পড়ো’-পাখী নাই বা হ’ল—সদ্য বনের চন্দনা’ !

৪

এমনি ক’রেই দিন কেটে যায় ; একদা এক নিশীথে,
শুকতারাটি চাইছে যখন ভোরের আলোয় মিশিতে,—
খবর এল—জলছে আলো গোঁসাই-বাড়ীর ছাত-ঘরে,—
নফর নন্দী নজরবন্দী রাখছে সারা রাত ধরে’ ;
একটি পরী বেড়ায় ঘুরি’—সাদায়-সাদা অঙ্গটি,
বেকুছে আর ঢুকছে ঘরে, করছে আরো রঙ্গ কি !

শুনেই বাবু বন্দুক এবং বিজুলী-বাতি হরিতে
চলল নিয়ে পল্লী-মায়ের কলঙ্ক দূর করিতে !
আগু-পিছু চায় না কিছু, এমনি দারুণ ব্যগ্রতা—
ভোরের রাতে চম্কে দিয়ে পড়ো’-বাড়ীর শুকতা !
সড়কী-হাতে সঙ্গীরা সব চলল ছাতে তেতালায়,
ভয়ের সাথে তীক্ষ্ণ নজর, কোন্ ধারে বা কে পালায় !

চিলের কোঠায় ঘরটি পূজার,—নির্জনতার গৌরবে
নিঃশ্বসিছে ঝাপসা-আলোয় ধূপের ধোঁয়ার সৌরভে ;
চটা-ওঠা দেয়ালটাতে স্বামীর ছবি টাঙানো,
চার ধারে তা’র শালু-মোড়া, রক্তে যেন রাঙানো !
সাত বছরের শুকনো বকুল—সাক্ষী সে কোন্ ফাগুনের—
মৌনমুখে জাগায় স্মৃতি ভস্ম-শেখী আগুনের !

পড়ো'-বাড়ী

শুভ্র বাসে অঙ্গ ঢাকা, মূর্ত্তি যেন স্তম্ভতার,
 রুদ্ধ-আঁখি, যুক্ত-করা, চক্ষে ঝরে অশ্রুধার ;
 পাষণ-সম লগ্ন যেন মেঝেয়-পাতা কস্থলে,
 আগলে তাহার ইহকালের পরকালের সম্বলে !
 মরণ-দিনের স্মরণ-রাতি আজো বুঝি হয়নি ভোর—
 চরণসাথে জড়িয়ে আছে বরণ-মালার পুষ্পভোর !

৫

রক্তজবা উঠল ফুটে' পূর্ব্বাকাশের কাননে ;
 দিব্য আভা লাগল তা'রি সংজ্ঞাহারা আননে !
 ভোরের হাওয়া দেয় ছলিয়ে মুক্ত-কেশের অঙ্ককার,
 সাত বছরের শুকনো বকুল,—সেও কি বিলায় গন্ধভার !
 চিত্রপটের মূর্ত্তিখানি উঠল ছলে' বাতাসে ;—
 রাতের সাথে দিনের মিলন ফুটেছে বুঝি আকাশে !

উদ্ধত সব পদধ্বনি থামল কেঁপে ছায়ায় ;—
 বিক্ষারিত রক্ত আঁখি—এ চায় শুধু উহারে !
 গোসাই-বাড়ীর এই সে মেয়ে—এই সে নারী অভাগী ?
 সীরাগ্রামের মুখ-ফেরানো এই সে কলঙ্কভাগী !
 স্বামীর ভিটায় বদ্ধ পাখী—এই কি বনের চন্দনা ?
 নন্দিত এ মূর্ত্তি—এ যে বিশ্বনাথের বন্দনা !

আষাঢ়ে লেখা

তিনদিন ধরে' মেঘ করে' আছে, রৌদ্রের নাই দেখা,
বন্ধ রয়েছে ধরাপাঠশালে ধরাবাঁধা পাঠ শেখা !
অবিশ্রান্ত বৃষ্টি ঝরিছে, পথে লোক নাহি চলে,
কার্যের ধারা ভেসে গেছে সব—বর্ষার ধারাজলে ।
এমনই সময় শয্যার পাশে সহসা পড়িল দিটি,—
তুলিয়া দেখিলু—বন্ধুর লেখা জরুরী ডাকের চিঠি !
এই ছুর্যোগে চলিবার মতো কোন কথা তা'তে নাই ;
শুধু সে লিখেছে—কাগজের লাগি' রচনা একটি চাই ;—
যেমন-তেমন চায় না আবার—ঝক্ঝকে হ'তে হবে,—
রূপে আর রসে ফেটে পড়ে যেন নূতনের গোরবে ।

চারিধার হ'তে বারিধারে যবে পড়িয়াছি সঙ্কটে,
তাহারি মধ্যে হেন বরাতের বাহাছরি আছে বটে !
খাওয়া-দাওয়া প্রায় বন্ধ যখন উনোনে চড়ে না হাঁড়ী,
এদিকে-ওদিকে প্যাচপেচে কাদা, ভিজ্রে কাপড়ের কাড়ি ;
বিছানাপত্র স্যাৎসেতে সব, ভাপসা গন্ধে ভরা,
কথা কহিবার মানুষ মেলে না,—পড়ে' আছি আধমরা,—
এমনই সময় বন্ধু আমার কাগজে গড়িয়া তরী
পাঠাইল দ্বারে—ভাসিতে হইবে, বাঁচি ভালো, নয় মরি !
একে দেহমন খিঁচুড়িয়ে আছে দৈবের তাড়নায়,—
তাহার উপরে বন্ধুর প্রেম—এও যে এড়ান' দায় !

আষাঢ়ে লেখা

সহসা 'শেল্ফ'-এ নজর পড়িতে, চেয়ে দেখি—মেঘদূত !
 ছবি দেখাবার কবি বটে মানি—অপূর্ব অদ্বুত !
 ধনের খবর জানিনাক তা'র—মনের খবর জানি,
 ছনিয়ার লোক তাই নিয়ে আজো করে নানা কানাকানি !
 আমারি মতন হয়তো সে ছিল অভাবে ও অভিযোগে,
 আমারি মতন হয়তো তাহারো গৃহিণী ভুগিত রোগে ;
 ছেলেটা কোথায় মাছ ধরিবারে গিয়েছে ক'দিন আগে,
 ঠিকা-ঝি-টা আজ ক'দিন আসেনি ; বলিতে লজ্জা লাগে,—
 বাসন হইতে গৃহমার্জনা সারি' নিজে কোনমতে,
 রাজবাড়ী হ'তে মাসোহারা লাগি' চেয়ে থাকে দ্বারপথে !

বলিহারি কবি—চারিধারে তা'র হেরিয়া হাজারো খুঁৎ—
 আকাশ হইতে মেঘে টেনে এনে বানাইয়া দিল দূত !
 তাও বৃষ্ণিতাম,—রাজবাড়ী থেকে টাকা আনিবার হ'লে,
 পেটের জ্বালায় নিরুপায় কবি পাগল হয়েছে বলে' !
 তা' না হয়ে কিনা - কোথা রামগিরি, মনোরথে তাহে চড়ি'—
 আজ্গবী এক পাগ্‌লা প্রেমিক হাওয়ায় তুলিল গড়ি' !
 —কোথা নাকি তা'রি প্রণয়িনী কাদে দারুণ বিরহতাপে,
 কা'র শাপে হয়ে ছাড়াছাড়ি দৌছে বড় দুখে দিন যাপে !
 সংবাদবহ করিয়া মেঘেরে পাঠালো তাহারি ঠাই,—
 হেন মনোরম মধুর মিথ্যা কেহ যাহা শোনে নাই !

ধূমজ্যোতিসলিলমরুতে আস্‌মানি মনোহারী
 প্রেমের পাথেয় সঙ্গে লইয়া হ'ল তাই পথচারী !
 চিরবিরহীর মানস-মরাল সাথে সাথে উড়ে তা'র,
 পাখা ঝটপটি' প্রাণ ছট্‌ফটি' উদ্ভট অভিসার !

মহাভারতী

—কত কাহ্নার হয়ে যায় পার, গিরি অরণ্য কত,
খুঁজিয়া খুঁজিয়া চাহে সে চিনিতে বিরহিনী মনোমত !
কনকবলয় ভ্রষ্ট হইয়া প্রকোষ্ঠ যা'র খালি'
ফুল দিয়া দিন গণিতে গণিতে নয়নে পড়েছে কালি ;
নৌবির বাঁধন খসিয়া পড়িছে উদাসী মনের ভুলে,
কাদে দিনরাত,—পড়েনাক' হাত একবেণী-বাঁধা চুলে !

উজ্জ্বলিনীর প্রাসাদ হইতে রেবা-কূলে-কূলে চাহি'
নটিনীর মতো চলেছে বেদম বাতাসের বন বাহি' !
কত না কুটজ, কত না কেতকী, কত কদম্ববন —
গন্ধ ধরিয়া, প্রিয়নিঃশ্বাস করিয়া অন্বেষণ ;
যেথায় যে কোনো রমনীয় মুখে রমনীর অধিকার,
বিদ্যাদ্বিটি মেলিয়া তখনি নেহারে বারম্বার,—
সেই কি তাহার বাঞ্ছিত প্রিয়া যক্ষবক্ষসাথী
মন্দমন্দ মেঘের পক্ষ সঞ্চালি' দিবারাতি ;
নীলাঞ্জনবরণপিঙ্গ নয়ন, বারণবাহী—
চলিয়াছে মেঘ চিরদয়িতার সন্ধান শুধু চাহি' !

—ঐ যে যাহার করতালি-তালে নাচিছে ময়ূরদল,
উতলা কলাপ মেঘেরই বরণে বিথারিয়া চকল !
গৃহ-পারাবত সঙ্গে হংস ঘেরি' যা'র চারিদারে
পদ্মকরের কৃপাকণা চেয়ে ঘুরে মণ্ডলাকারে !
—ঐ কি আমার প্রিয় বন্ধুর বাঞ্ছিত বিরহিনী,
কাপীর তলে কটিতটে তবে বাজে কেন কিঙ্কিনী !
মদির নয়নে বিলোল চাহনী, কুসুমিত কেশপাশ—
বিরহী আননে ফুটাবে কেমনে হেন হাসি-উল্লাস ?

আষাঢ়ে লেখা

পাণ্ডু-অধরা কৃশকলেবরা একবেণীধরা নারী—
নয়নভুলান' রমণীর মাঝে তা'রে তো চিনিতে নারি !

যা-কিছু সেথায় সুন্দর আছে সৃষ্টি-গহনকোণে,
কবির দৃষ্টি এড়ায়নি কভু সে বিজলী ইক্ষণে !
চোখের তারায় প্রাণের ধারায় চলেছে অবাধ গতি—
কুড়ায়ে কুড়ায়ে অকূল প্রেমের অকূল শঙ্কারতি ।
—বন্ধু আমার, চেয়েছ যা' তুমি এ ভরা বাদলদিনে,
কিছুই তাহার পড়ে না যে চোখে এ আশার পথ চিনে' !
নূতনত্বের নাহিক গন্ধ,—সেই একঘেয়ে কথা
শুধু মনে পড়ে এ বাদলে-ঝড়ে বাড়াইয়া ব্যর্থতা !
ঝক্ঝকে লেখা কোথা পা'ব ভাই, ভিতরে বাহিরে কালো—
শ্যাম আষাঢ়ের যে ছায়া পড়েছে, সেথা যে মিলে না আলো !

মাটির ধরণী বড়ই পুরাণো, পুরাণো মানবমন,—
আরো পুরাণো যে চিরকেলে সেই প্রণয়ের ক্রন্দন !
বিজ্ঞান নহে,—নূতন খোরাক যোগাবে যে বারোমাস—
মানুষেরই সাথে চিরসাথী তা'র প্রণয়ের ইতিহাস ;
কবি কালিদাস জেনেশুনে' তবু সেই পুরাতনো কথা
ছন্দে গাঁথিয়া—কি করিয়া ভাই লভি' গেল অমরতা ?
কাঁকি দিয়ে কবি নাম কিনে' গেছে মূর্খের বাঁধা-হাটে—
আজিকার দিনে হেন রদি মাল আর কি কখনো কাটে !
—তা'রি সেই কথা, কাগজে তোমার চলিবে না,—জেনেশুনে',
আষাঢ়ে-মেঘের সেই ভিজে তুলো আবার তুলিছু ধুনে' !

মহাভারতী

ভালো নাহি লাগে--টেনে ফেলে' দিও--ভিজ়ে' তোষকের মতো—
 বিষম বর্ষা, তা'র পরে আর করিও না বিব্রত ।
 —ওদিকে আবার কাজ আছে চের,—দেখাশুনা, তোলা-পাড়া ;
 অরটুকু গেছে, ঘুমটা ভেঙেছে,—গৃহিণীরও পাই সাড়া !
 মেঘদূত—দেখি, নিঃফল নয়,—তাহারি রুগ্ন চোখে
 পালটি' পড়িলু প্রেমের মন্ত্র স্তিমিত বর্ষালোকে ;
 —মনে হ'ল যেন—তাহারি মাঝারে কাঁদিয়ে আমারি প্রিয়া !
 ভাবি,—কি উপায়ে ভুলাই তাহারে কোন্ সাস্থনা দিয়া !
 বুকে রেখে যা'রে মিলে না স্বস্তি, তারেই রেখেছি দূরে,—
 সেই কথাটাই পালটি' শিখিলু পাগ্লা-কবির শূরে ।

—ঐটুকু ছধ !—ফেলে' রাখো কেন ? অনেক হয়েছে রাত—
 ঘুমাও এবারে,—ধীরে ধীরে গায়ে বুলাইয়া দিই হাত ।
 ঝর-ঝর-ঝর—ঝম-ঝম-ঝম—আবার নামিল ধারা,
 গড়গড় করে' মেঘের ডঙ্কা সজোরে দিতেছে সাড়া !
 —মন হ'তে মনে, প্রাণ হ'তে প্রাণে বহিছে বিজলী-বাণী,
 প্রেম যেথা আছে—দূরে কিবা কাছে—মনে-মনে জানাজানি !
 ঘনাইয়া উঠে মেঘের আধার বিরহ-অন্ধকারে,
 ঝমঝমে' ধারা বাজনা বাজায় ছাদে ও বন্ধ দ্বারে ;
 হিয়ার মাঝারে হুরুহুরু করে' গুরুগুরু দেয়া ডাকে.
 বুকে বুক রাখি' অস্থির মন, হায় ! কে বুঝায় কা'কে ?
 মিলন বিরহ—ছুই যে অসহ—সমান বেদনা-ভরা—
 —এ যেন হয়েছে মরণের সাথে দিনরাত ঘর-করা ।

প্রতিশোধ

বেশ মনে আছে—এই তো সেদিন,—
 শক্ত লাঠির ঘায়ে
 তিনটেকে কাৎ ক'রেছিল তিনু
 এই ঘোষপাড়া গাঁয়ে !
 —আক্কেল পেয়ে ডাকাত-বেটারা
 বুঝেছে সেদিন ঠিক—
 গ্রাম বটে এই চর-ঘোষপাড়া,
 আর মাড়াবে না দিক !
 —বলিহারি তিনু—বাপের বেটা রে—
 এই সেদিনের ছেলে !
 সাতটা গাঁয়ের সেরা ওস্তাদে
 দুই হাতে রাখে ঠেলে !
 লাঠি নয়, যেন কুমোরের চাক—
 ফিরায় সাধি কা'র ?
 পাঁচশো মানুষ দাঁড়িয়ে দেখেছে
 অবাক কাণ্ড তা'র !

 চোখে না দেখলে, কেউ কি সে কথা
 করে আজ প্রত্যয় ?
 —ঐ ভিটেটায়—বুঝলে বাবাজি,
 আমি আর অক্ষয়—
 স্বচক্ষে দেখা—সন্ধ্যার আগে—
 বেটারা তো লাঠি খেয়ে
 আদাড়ে-পাঁদাড়ে যে যা'র পালালো
 ঝাড়-জঙ্গল বেয়ে !

মহাভারতী

পরদিন প্রাতে, আমি বলি, বিস্ম,
 দেখলি তো সব চোখে—
 ছেলে নয় তোর, রত্ন জানিস্,
 যা' খুসি—বলুক লোকে !
 ইস্কুলে সে যে মস্ত পড়ুয়া—
 শুনেছি তা' বারবার ;
 তবু বলি, বিস্ম, কালকের কাজে
 জোড়া মেলেনাক তা'র !
 দুই হাত তুলে' বাসি-মুখে তা'রে
 আশিস্ করছি আজ—
 মানুষ হোক সে !...ক্ষান্ত হইল
 ভজহরি ভট্টচায়্ ।

২

সেই ভজহরি—বিস্মর আজ সে
 সবচেয়ে শত্রুর ;
 আজ সে যণ্ডা চণ্ডাল শুধু—
 দেশের কুপুস্তুর ।
 ছ'বছর আগে, যে ছেলেকে তা'র
 করেছে আশীর্বাদ,—
 আজ তা'রি ঘাড়ে চাপাইতে চায়
 বিশ্বের অপরাধ !
 কারণটা এই—নদীর কিনারে
 চর-ঘোষপাড়া চরে,
 ক'-পুরুষ ধ'রে যে জমীটা বিস্ম
 ধানের আবাদ করে,—

প্রতিশোধ

তা'রি উত্তরে ভজো ভট্‌চায়
 গত ছুই বৎসর,
 বিঘা ত্রিশ জলা মাছের জন্তে
 লইয়াছে জলকর !
 মোড়লের জমী ভজোর বিলটা—
 এমনি সে পাশাপাশি,
 বানের বছরে আবাদের জলে
 জলকর যায় ভাসি' !
 নাবালো জমীতে হাল-সনে তাই—
 বাধ বেঁধে ভট্‌চায়
 বিস্তু-মোড়লের কায়েমী স্বত্ব
 কাহিল করেছে আজ !

শ্রাবণের গাঙে বন্যা নেমেছে,
 মাঠে এক হাঁটু জল ;
 কেঁদে কয় বিস্তু—হে দাদাঠাকুর,
 বছরের সম্বল—
 ঐ ধান-ক'টা মেরো না আমার,
 ঠেকিয়ে জলের রোখ ;
 ভজো কয়—ভালো ! মাছ ভেসে' যাক—
 আচ্ছা তো ছোটলোক !
 কাঁদাকাটি হ'তে কঠিন বচসা
 বাধিল ভজোর সাথে,
 নিরুপায় শেষে—বিস্তু আর তিনু
 বাধ কেটে দিল রাতে !

মহাভারতী

প্রাণ আর মানে বিবাদ বাধিলে—

প্রাণ যা'র তা'রি জয় ;

বিশেষতঃ যদি প্রাণের শক্তি

স্থায়ের পক্ষে হয় !

ভট্‌চাখ্‌ আজ চাঁড়ালের কাছে—

হেন ঘোর অপমানে,

পৈতা ছুঁইয়া শপথ করিল

চাহি' আকাশের পানে ;

— এত বড় বাড়্‌ বেড়েছে চাষার !

ভাঙি' তা'র শিরদাঁড়া,

একঘরে' করে' তাড়াব বেটারে

ভিটেমাটি করি' ছাড়া !

৩

হেন ইচ্ছার উপায় মিলিতে

বিলম্ব নাহি হয় !

তাই মনে পড়ে,—গত মাঘমাসে,

যখন অন্ধোদয়,—

স্বৈচ্ছাসেবক সাজি' তিনকড়ে',

সেদিন স্নানের ভিড়ে,

জল দিয়েছিল মূর্চ্ছিত কোন্

ব্রাহ্মণ-রমণীরে !

—সে কাজ যে শুধু হীন শূদ্রের

জল করিবারে চল্‌,

উচ্চ জাতের জাত মারিবার

শয়তানী কৌশল—

প্রতিশোধ

এতদিন পরে ভট্টচার্য্যের
পড়ে' গেল তাই মনে,—
তা'রি সাজা দিতে সহসা আজিকে
লাগিল সে প্রাণপণে !

চর-ঘোষপাড়া—যে সে ঠাই নয়,
ছ'শো বামুনের বাস,
তা'রি বুকে বসে' চণ্ডালে করে
এ হেন সর্বনাশ !
ভজো ভট্টচায়্ সমাজের হিতে
লাগিল কোমর বেঁধে !
পাড়ায় পাড়ায় তোলপাড় করে'—
শাসিয়ে, পটিয়ে, কেঁদে,
একে-ওকে-তা'কে হাতে-পায়ে ধরে'
এমনি পাকালো ঘোঁট,—
বিশু চণ্ডালে তাড়ায়ে ছাড়িল
হ'য়ে সব একঘোঁট !

কে বা কা'রে রাখে, কে বা কা'রে মারে
কে কোথায় কবে থাকে,—
আজ যে বা নীচু, কাল সেই উচু—

যে পথ আজিকে চলিয়াছে বেঁকে,
কাল দেখি— তাই সোজা !
সময়ের গতি, শেষ পরিণতি
জগতে যায় না বোঝা !

মহাভারতী

৪

কলেজে ও মাঠে ক্রমে বেড়ে উঠে—
 ওদিকে তিনুর নাম ;
 যেমন পড়ায়, তেমনি খেলায়,
 অশেষ গুণগ্রাম !
 সহরের কোণে তা'রি অঙ্গনে
 নিত্য ছাত্র-মেলা,
 প্রতি সন্ধ্যায় সঙ্গী-সাথীরে
 শিখায় সে লাঠিখেলা !

সে বলে—হাতের দুই হাতিয়ার—
 লেখনী আর সে লাঠি ;
 মনের সঙ্গে দেহের স্বাস্থ্য
 ঠিক রাখা চাই খাটি !
 বিপদের হাতে উদ্ধার পেতে
 শ্রেষ্ঠ উপায়ই হাত ;
 বলরাম তাই দেবতা তাহার,
 নয়কো জগন্নাথ !
 আরো বলে সে যে—শক্তির শুধু
 ঠিক ব্যবহার চাই,
 নষ্টলে তা' শুধু বাধা হ'য়ে বাঁধে
 আপনার পথটাই !
 নূতন গুরুর নবীন মস্ত্রে
 মেতে উঠে সাথীদল,
 পাঠের সঙ্গে লাঠিরে মিলায়ে
 বাড়ায় বুকের বল

প্রতিশোধ

বিশ্বনাথের ছঃখ ঘুচেছে ;—

যোগা পুত্র তা'র

শেষ পরীক্ষা সাক্ষর করেছে

জিনিয়া পুরস্কার ।

তবু থেকে-থেকে শুধু মনে পড়ে

সেই ঘোষপাড়া গ্রাম—

শত-স্মৃতি-ঘেরা পল্লীটি তা'র,

জীবনের সুখধাম !

৫

বছরের পর বছর চলেছে

কত সুখে-হুখে বহি' ;

কত বসন্ত, কত-না বর্ষা,

কত শীতাতপ সহি'

কেটে যায় দিন ; ভরা যৌবন

ভরি' তোলে দেহমন ;

তিনুর জীবনে বাঁধা পড়িয়াছে

নূতনের বন্ধন !

হাকিমী-পদের ঘূর্ণীচক্রে

ঘুরিল সে কত দেশ,—

কত না জেলার কত-না সহর

এরি মাঝে হ'ল শেষ !

যেমন বিদ্যা তেমনি বুদ্ধি,

তেমনি বিনয় সাথে ;—

যশের পসরা ভরি' উঠে তা'র

মানুষের শ্রদ্ধাতে !

মহাভারতী

যেখানেই যায়—অর্ঘ্য কুড়ায়,
রাখিয়া সবার মান ;
প্রিয়দর্শন উন্নত দেহ—
তেজস্বী, বলীয়ান ;
ব্যায়ামাবদ্ধ সুপুষ্ট বাহু—
একটি দিনের লাগি'
ছাড়ে নাই লাঠি—বাল্যবন্ধু—
আজিও সঙ্গভাগী !

বৃদ্ধ বিস্তর পাকিয়াছে কেশ ;
জীর্ণ বক্ষপাশে,
মাস ছয় হ'ল পৌত্র একটি
শতদলসম হাসে !
মাঝে মাঝে তবু পুত্রেরে ডাকি'
করে শুধু এক নাম—
চন্দ্র-আরাম সেই সুখধাম
চর-ঘোষপাড়া গ্রাম !

৬

এমন সময় সহসা স্রোযোগ
সন্মুখে দেখা যায়—
তিনকড়ি দাস বদলি হইল
মাগুরা মহকুমায় !
দেশের মানুষ দেশে আসিতেছে,—
চারিদিকে ডানে-বঁয়ে
বার্তা তাহার রটে' গেল ক্রমে
ঘরে-ঘরে গাঁয়ে-গাঁয়ে ।

প্রতিশোধ

একটি বৃদ্ধ ঘোষপাড়া গ্রামে

শুধু শুনি' সেই নাম—

মজ্জার মাঝে কাঁপিয়া উঠিল,

ললাটে বহিল ঘাম !

পূর্ব 'ব্যাভার' মনে পড়ি' তা'র

চক্ষে নামিল ধারা,

ভাবে—এইবার ঘর-সংসার—

জমি-জমা সব সারা !

এতদিন পরে সে ব্যাটা যখন

ফিরিয়া আসিছে দেশে,

নিশ্চয় তা'র ফন্দী আমারই

শাস্তির উদ্দেশে !

দেশের হাকিম—সব পারে বাবা,—

কে ঠেকাবে তা'রে আজ ?

জেলে পূরে যদি—শিহরি' উঠিল

ভজহরি ভট্‌চাষ !

দিনরাত ভেবে ক্ষুধা ও নিদ্রা

গেল তার' দূর হ'য়ে ;

একবার ভাবে—গ্রাম ছেড়ে যাবে

ছেলেপুলে সব ল'য়ে ;

ফিরে' ভাবে—লাঠি, হাকিমীর কাজে,

নিশ্চয় হাতছাড়া ;

এই ফাঁকে যদি 'লেঠেল' লাগিয়ে

করে' দিই কাজ সারা !

মগাভারতী

‘মরিয়া’ হইয়া উঠিল সে ক্রমে—

চিন্তার তাড়নায়,

সংবাদ এলো—নূতন হাকিম

বেরিয়েছে নৌকায়।

চলিল লেঠেল—ভজোর মন্ত্রে—

ধরি’ মাল্লার বেশ,

রাত্রি নদীতে পান্‌সী লইয়া

কার্য্য করিতে শেষ।

হায় রে কপাল—ছ’দিন পরে যা’

ভগ্ন-দূতের মুখে

শুনিল, তাহাতে পেটের মধ্যে

হাত-পা গেল যে ঢুকে’ !

—কষ্টা, কি আর কইব তোমায়,

মুখে আসেনাক ‘রা’ !

কে-ডা যায়—বলে’ মোহনার মুখে

যেমনি ভিড়েছে ‘লা’—

সেই লাফ দিয়ে বেরোল যোয়ান—

‘পেল্লায়’ লাঠি হাতে !

—হাকিমই সে খোদ—গলার আওয়াজে

ঠিক টের পেলু রাতে !

তারপর—হ’ল কি যে সে কাণ্ড—

কি যে ওস্তাদী মা’র,—

কোথায় পান্‌সী—ভেঙে’-চুরে’ সব

জলে-থলে একাকার !

প্রতিশোধ

বাড়ির উপরে বাড়ি এসে পড়ে—

লেগে যায় 'ব্রাত্ম'—

মোটাই সময় দেয় না, কর্তা,

আস্তু খোদার যম !

মারের জ্বালায় চার-চার জন

ছিটকিয়ে পড়ে জলে ;

সর্দার নিজে জখম হয়ে সে—

খালি বাপ্ বাপ্ বলে !

—ধরতে পারেনি কা'রেও, কর্তা,—

এই যা' ভরসা প্রাণে ;

ডাঙা-পথে-পথে পালিয়ে এসেছি,—

কি হবে, খোদাই জানে !

ভজো ভট্‌চায়্—ব্যাপারটা সব

শুনিল শুধু হাঁ করে'—

জাগিয়া স্বপ্ন দেখিল বৃদ্ধ—

চলেছে দ্বীপান্তরে !

৭

দেশের হাকিম শফরে এসেছে

নিজ গ্রামে আজি তা'র ;—

ধনী-গৃহস্থ শশব্যস্ত

সাজায়েছে ঘরদ্বার !

গ্রামের প্রান্তে মধুমতী-তীরে

তা'রি তাঁবু-দরবারে—

ভোর হ'তে আজ আবালবৃদ্ধ

জমিয়াছে চারধারে !

মহাভারতী

রাজ-আহ্বানে আগত সেখানে

ভজহরি ভট্চায় ।

কৈদে কয় বুড়া—অক্ষয় খুড়া,

ফাঁসির ছকুম আজ !

আসন হইতে নামিয়া হাকিম

আসিল যখন কাছে,

ভজোর চক্রে মনে হ'ল, বুঝি—

বলির খড়্গ নাচে !

লজ্জিত হাসে মোহর একটি

পদতলে রাখি' তা'র,

প্রণমিয়া তা'রে কহিল হাকিম—

বিনয়ের অবতার—

ব্রাহ্মণ, তব দুই হাত-তোলা

পূর্ব আশীর্বাদ—

চিরজনমের সম্বল মোর—

সারা জীবনের সাধ !

ঘর-ছাড়া করে' দিলে যে ঠাকুর—

আমি কি সে কথা মানি ?

বাপের মায়ের অভিসম্পাত

পুত্রে ফলে না, জানি !

ভজো ভট্চায় শুনিয়া সে কথা

লুটে' পড়ে সেইখানে ;

সঙ্গীরা দেখে—সংজ্ঞাহারা সে ;—

কি আঘাতে—কে বা জানে ।

ভক্ত ভোলা

ভক্ত ভোলা তীর্থযাত্রী বন্ধুজনসাথে ;—
বহু দিবসের বাজা-হেরি' জগন্নাথে
সার্থক করিবে আঁখি ;—সম্মুখেতে রথ,
অসংখ্য যাত্রীতে ভরা শ্রীক্ষেত্রের পথ ।

কত নদী, কত মাঠ, কত বনচ্ছায়—
সুদীর্ঘ সরণি ধরি' পার হ'য়ে যায়
পায়ে পায়ে । মন বাঁধা যে রথের সনে,—
পথের যাতনা যত লাগেনাক মনে ।
যেথায় ঘনায় রাত্রি, সেইখানে থামে ;
অজস্র লোকের ভিড় দক্ষিণে ও বামে—
দরিদ্র মানব-মেলা জুটে চারিধারে,
দেবালয়ে পান্থাবাসে কাতারে-কাতারে ।

কা'রো বা মিলে না অন্ন, নিঃসম্বল কেহ ;
বৃক্ষতলে পথে কা'রো রোগাক্রান্ত দেহ—
লুটিছে কাতর কণ্ঠে ফুকারিয়া জল ;
সেবা লাগি' থামে ভোলা বিষণ্ণ বিহ্বল ।
কেহ-বা এগিয়ে চলে, কেহ পড়ে পিছে ;
কা'রো মন গৃহপানে ফিরিয়া চাহিছে—
পথশ্রমে, বর্ষাজলে উদ্ভ্রান্ত কাতর ;
সঙ্গীর উৎসাহে শুধু চলে করি' ভর !

মহাভারতী

২

সেবারে ছুঁভিক্ষ ভারী উৎকল-প্রদেশে ;
সম্মুখে সুভদ্রাগড় ; অনাহারে ক্রেশে
সেথায় মরিছে লোক ; কেহ বা পলায়ে
ছুটিছে বঙ্গের পথে জঠরের দায়ে !
—ছ'ধারেরই জনশ্রোত জলশ্রোতাকারে
মিশিতেছে পবম্পরে পথের ছ'ধারে ;—
পথেই যেন-বা রথ—হেন গগুগোল !
আগে পিছে উচ্চকণ্ঠে উঠে হরিবোল ।

চলেছে যাত্রীর দল তথাপি উৎসাহে ;
ভোলা শুধু নিরুৎসাহে চারিপাশে চাহে—
হেরি' মানবের ছঃখ ; স্মরি' নারায়ণ —
বান্ধিতে পারে না তবু বিপর্যাস্ত মন ।

বন্ধু কহে, আছে আর মোটে দিন ছয়,
এইবারে ক্ষিপ্ৰপদে না চলিলে নয় ;
তব সাথে তীর্থপথে চলা—দেখি, ভার ;
—পরের ছঃখের ঝোঁজে কি কাজ তোমার ?
অপ্রতিভ ভোলা বলে,—এই চলো যাই,
—কতই বিলম্ব হবে ? বেশী দেরী নাই ;
মেয়েটার অরটুকু ছাড়ে যদি রাতে,
গোবিন্দের নাম নিয়ে পালা'ব প্রভাতে ।

ভক্ত ভোলা

৩

ভদ্রাগড়ে সন্ধ্যা নামে—ঠিক পরদিন ;
 দ্রুত চলি' ছই বন্ধু চলৎশক্তিহীন ।
 আহারে বিশ্রামে তবু মিলেনাক ঠাই,—
 এমনই দেশের দশা—উপায়ও যে নাই ।
 দুর্ভিক্ষের সহচরী মহামারী আসি'
 সুবিস্তীর্ণ জনপদ দিয়া গেছে নাশি' ।
 সুস্থ যা'রা—পলায়িত, শুধু রুগ্নজন
 নিরুপায় পাড়ে' আছে চাহিয়া মরণ !

যে শূন্য মন্দিরে দৌহে রজনী কাটায়,
 তা'রি পাশে শেষরাত্রে শব্দ শোনা যায়—
 যেন রুদ্ধ হাহাকার মৃত্যুর পরশে !
 নিদ্রিত বন্ধুর কাণে সে শব্দ না পশে ।

ভোলা উঠি' তাড়াতাড়ি হইল বাহির,—
 আপন কর্তব্য তা'র করি' ল'য়ে স্থির
 মনে মনে । বন্ধুরে সে জাগা'ল না আর,
 না করিয়া মিথ্যা সৃষ্টি নূতন বাধার ।
 প্রভাতে জাগিয়া বন্ধু চাহে চারিধারে,—
 কোথাও নাহিক ভোলা,—বিস্ময়পাথারে
 রহিল অবাক হয়ে সারা দিনে-রাতে ;
 হতাশে একাকী যাত্রা করিল প্রভাতে ।

মহাভারতী

৪

ভোলার কণ্ঠের আর রহিল না পার ;
অশ্রু-চক্ষে হেরে সে যে কৃষি-পরিবার,—
মরণে ছ'জন তা'র শাস্তি লভিয়াছে !
দ্রীলোক বালক যা'রা উপবাসী আছে,—
তা'দেরও মৃত্যুর বড় নাই বেশী দিন ;
পুরুষের মধ্যে বাকী ছিল যে প্রবীণ,
সংক্ষেপে তাহার কাছে শুনি' সমাচার,
ক্রতপদে বাহিরে সে—চিস্তি' প্রতীকার ।

আপন পাথেয় হ'তে, যাহা প্রয়োজন,
দীর্ঘপথ ঘুরি' কণ্ঠে করি' আহরণ,
লাগিল সেবার কার্য্যে হয়ে একমনা—
গোবিন্দের পদে স'পি' তীর্থের ভাবনা ।

সে রাত্রে দেখে সে স্বপ্ন—যেন চারিধারে
অজস্র আর্তের মেলা ; তাহারি মাঝারে
চলেছেন জগবন্ধু হেঁটে খালি-পায়ে ;—
ভোলারে দেখিয়া—ল'ন ছ'বাহু জড়ায়ে !
কাটিল সপ্তাহকাল,—পক্ষ কেটে যায় ;
ধীরে ধীরে ক্রান্তিহীন কষ্টব্যবস্থায়,
সঙ্কিত পাথেয়বলে, দুঃস্থ পরিবার
উঠে ক্রমে সুস্থ হয়ে সাহায্যে তাহার ।

সময়ে সকলই হয়—পড়ে যা'রা, উঠে,—
আনন্দে শিশুর কণ্ঠে কলধ্বনি ফুটে,
নর ফিরে' কাজ করে, নারী উঠে হেসে ;—
দেখি' দেশে ফিরে ভোলা আশাটের শেষে ।

ভক্ত ভোলা

৫

সবাই শুধায়,—কি হে, দেখে' এলে রথ ?
মুহু হাসি' কহে ভক্ত—দেখে' এলু পথ ;—
রথের না পেলু দেখা মানুষের ভিড়ে ;—
সবই কপালের লেখা, এলু তাই ফিরে' !

—বলো কিহে ?—ও হো ! তা' যে বলিবার নয় ;—
তীর্থকথা মুখে নিলে অপরাধ হয় !
ভালো, তব বন্ধু কোথা—ফিরেনি তো ঘরে !
আরও কোথা গেল বুঝি, পুরী হ'তে পরে ?

ভক্ত ভোলা হেসে শুধু নিজ কাজে যায় ;
আরো এক পক্ষ কাটে বন্ধুর আশায় ।
ভাবে সে, চাহিব ক্ষমা, আশুক তো আগে ;
ভাঙিতে বন্ধুর রাগ কতক্ষণ লাগে !

৬

শ্রাবণে ফিরিল বন্ধু আপন আলয়ে ;
ভোলার নিকটে গিয়া ক্রোধভরে কহে—
মধ্যপথে ছেড়ে যাবে—ছিল যদি মনে,
কি কাজ একত্রে তবে যাওয়া মোর মনে ?
ভোলা কহে—ছাড়িয়াছি বটে মধ্যপথে,—
তবে কিনা—আমি ভাই, যাইনি তো রথে !
মধ্যপথে অন্য কাজে বাঁধি' মোর হাত,
আমারে ফিরায়ে দিল দেব জগন্নাথ !

মহাভারতী

—মিথ্যাবাদী ! মোর সঙ্গে এই ব্যবহার !
 দেখিছু তোমারে আমি তিন-তিন বার,
 রথের সিঁড়ির 'পরে ঠাকুরের নীচে, —
 আমারে ভুলা'তে চাও ধান্মা দিয়ে মিছে !
 —শুধু চোখে দেখা নয়,—এগিয়ে সেখানে
 চীৎকারি' ডাকিছু কত'—শুনিলে না কাণে !
 দারুণ লোকের ভিড়ে নারিছু ধরিতে,
 বার বার ব্যর্থ হয়ে হইল ফিরিতে ।

অশ্রুণীরে তিতি' ভক্ত কহে পুনরায়—
 মোটেই পুরীতে আমি যাই নি তো ভাই ;
 ভদ্রাগড়ে ছিছু পড়ে' একপক্ষ কাল ;
 —তীর্থ লাগি' মিথ্যা ক'ব ?—হায় রে কপাল !

—কেন বাড়াইছ মিথ্যা, কিবা প্রয়োজন ?
 এর আগে নীচতা তো দেখিনি এমন !
 তিন-তিন বার নিজে দেখিলাম চোখে—
 প্রভুর পায়ের কাছে ! তবু যাও বকে' !

শুনি' ভক্ত লুটাইয়া পড়ে ভূমিতলে,
 ভাবিয়া প্রভুর কাণ্ড, ভাসি' নেত্রজলে !
 ভক্ত আর ভক্তবন্ধু ভিন্ন কথা কয় ;—
 • কা'র সত্য—সত্যি সত্য—কে করে নিশ্চয় ।*

* টল্টয়ের অন্তঃসরণে ।

যুক্তিপথ

—শ্রীনিবাস বৈরাগী

বৈরাগ্যের দীক্ষা লইল গুরুর চরণে মাগি' ।
 গ্রামের প্রান্তে শ্মশানতলায় মাটির কুটার-ঘরে,
 দিনরাত নাই, না জানে কামাই, মন্ত্রসাধন করে ।
 পথের পথিক পথে যেতে রাতে সহসা শুনিতে পায়,—
 গাহে বৈরাগী—‘হরি নাম বিনে বিফলে জনম যায়’ !

বাগ্দি-পাড়ার সুধয়া আসে, বাকুই-পাড়ার বাঁশী,
 বুনো-পাড়া থেকে বঙ্কুর পিসি, দোসাদ-পাড়ার দাসী,—
 মধুর কণ্ঠে নাম শুনে' যায় গোপীযন্ত্রের সাথে,
 —যা'র যে সময় মনের মতন, কেহ দিনে কেহ রাতে ।
 আঁখি করে' বাঁকা দেখে তা' বিশাখা, ভালো নাহি লাগে আর,
 —সেবাদাসী, তবু সেবার সময় মিলাই কঠিন তা'র !

হরির কৃপায় দিন চলে' যায় বৎসর পাঁচ-ছয় ;
 ভক্তের ভিড় ক্রমে বাড়ে, পেয়ে ভক্তির পরিচয় ।
 তৃণাদপি নীচ, প্রেমের কথায় চোখে আসে তা'র জল,
 গৌরনামের গুণগানে হয় তন্ময় বিহ্বল !
 ব্রতে উপবাসে আধাদিন কাটে, দেহপানে নাহি চায়,
 কণ্ঠে তাহার ভজন শুনিলে শ্রবণ ফিরান' দায় ।

মহাভারতী

সখী-বিশাখার সেবায় যদিচ অপরাধ বড় নাই,
সন্তানহীন কোলখানি তবু করে তা'র খাঁই-খাঁই ।
—‘ঘরসংসার কিবা দরকার, মনে হয়, যাই ফেলে’ !
—কহে বৈরাগী— ‘ঐ ত গোপাল, ভাবো না নিজের ছেলে’ !
পটের গোপালে চাহিয়া তবু সে, কি ভাবি’, হাসিয়া উঠে,—
চোখে-মুখে তা'র গোপন ব্যঙ্গ রঙ্গের মতো ফুটে !

সম্মুখে আসে সুদূর পুরীতে জগন্নাথের রথ,—
কয়দিন থেকে বাবাজী এবার খুঁজিছে তাহারি পথ ।
যা-কিছু তুচ্ছ সম্বল তা'র—পুরাণো দিনের পুঁজি,
তাই নিয়ে কবে যাত্রা করিবে, মরিতেছে দিন খুঁজি’ !
বাগ্দি-পাড়ার সুধা আর দোসাদ-পাড়ার দাসী—
সঙ্গে যাইবে, কয়দিন থেকে ধন্য লাগা’ল আসি’ !

সখী-বিশাখার মনের শাখায় ফুটে ফাল্গুনী ফুল,—
সাধু-সঙ্গের সাধুর সেবায় হয় তাই দিক্‌ভুল !
রসকলি-কাটা নাসিকার পাশে চঞ্চল ছ’টি ভুরু
দখিনা বাতাসে ডানা মেলি’ বুকি করে শুধু উড়ু-উড়ু !
মধুর কণ্ঠে হরিনাম সুধা মিটায়না কুধা তা'র,
বাঁধন কাটায়ে খুঁজে সে গোপনে মুক্তির পারাবার ।

মুক্তিপথ

গাহে শ্রীনিবাস — ‘ওপারের পথ দেখাও ঠাকুর মোরে,—
আর কত দিন বাঁধিয়া রাখিবে মিথ্যার মায়া-ডোরে’ ?
—গায় আর কাদে, গাল বয়ে তা’র নামে শাওনের ধারা,
ভক্তের দল ভক্তির বানে হয়ে যায় দিশাহারা !
সখী বিশাখার বাঁকা কটাক্ষে মিলায় বক্র হাসি ;
কেহ না দেখুক, দেখে একজন—বারুই-পাড়ার বাঁশী ।

দোসরা আষাঢ় যাত্রার দিন ; সহসা পূর্বরাতে
দাসী-বিশাখার দেখা নাই আর আখড়ার ত্রিসীমাতে !
খোঁজে সুধম্মা, খোঁজ করে দাসী—তোলপাড় করি’ পাড়া,
বিস্মিত সবে বাবাজীর মুখে না পেয়ে শোকের সাড়া !
আরো বিস্ময়—তুলসীতলায় পৌতা ছিল যে-বা ধন,
কালিকার রাতে বৈষ্ণবীসাথে তাহারো অদর্শন !

কাদে সুধম্মা—‘কি হবে গৌসাই,—এ দেখি বজ্রাঘাত’ !
কহে শ্রীনিবাস, দেব উদ্দেশে ভূঁয়ে করি’ প্রণিপাত,
—‘ভালোই যুক্তি দেখালে দেবতা, এই তো যাত্রাপথ,
আমারি ছুয়ারে আনিলে টানিয়া তোমার মুক্তি-রথ !
—সব বন্ধন কাটিলে যখন, হে ঠাকুর এইবার—
পাথেয়বিহীন পথিকে আজিকে করিতে হইবে পার’ ।

দুঃখবাদী বন্ধুর প্রতি

বন্ধু, বারেক চোখ চেয়ে দেখ'—উঠে পূর্ণিমা-চাঁদ,
 আকাশের তীরে মুছে' যায় ধীরে আধারের অপরাধ ।
 তিথিতে তিথিতে জমে' যে বেদনা মরিল স্মৃতিকাঘরে,
 তা'রি বুক চিরে'—হের' কি মানিক জ্বলিল তোমারি তরে ।
 —সোনার চস্মা, খুঁজে' যা' পাওনি, ঐ দেখ' তাকে তোলা,
 মশলার ডিবে—ঐ তো সমুখে, এই দেখ' আল্‌বোলা ;
 হারানো চটির পাটি-টি লুটায় দূরে ঐ আঙিনাতে,—
 পেয়েছ তো সব,—এইবার উঠে' চলো দেখি ভাই ছাতে ;
 —নাই-নাই-নাই ! বালাই, বালাই—নাই কি বলিতে আছে ?
 এখানে, না-হয় ওখানে আছে তা',—হয় দূরে, নয় কাছে ।

একটু দাঁড়াও—এই কোণটায় বিছাইয়া দিই পাটি,
 রোসো রোসো ভাই—সেজে দিই তব সাধের আল্‌বোলাটি ;
 দিব্য আরামে বসো' তো বন্ধু, মেজাজটা করি' মিঠে,
 মোলাম করিয়া আনো ক্ষণতরে ঐ খর-দৃষ্টিটে ।
 সুপ্তিদাত্রী এ হেন রাত্রি, এমন স্নিগ্ধ আলো,—
 জানো তো বন্ধু, বক্ষে তাহারো আছে কতখানি কালো !
 —ঐ দীপ্তির পিছনে লুকায়ে কত অতৃপ্তি-দাহ—
 নিয়তির রীতি মানি' হাসিমুখে ব্রত করে নির্বাহ ;
 জানে—এর পারে উদিবে তপন, জানে—পিছে আছে অমা,
 তবু সুখেহুখে ঐ তো সমুখে হাসে চিরমনোরমা !

কুহুনিশীথিনী কে স্মরিবে আজি এমন চাঁদিনী রাতে ?
 তাই বলে' সে কি উঠিবে না আর আকাশের আঙিনাতে !
 আজি এ আলোকে পড়েনাক চোখে হারানো যে ক'টি তারা,
 ভেবেছ কি মনে, আমার গহনে তা'রা চির-জ্যোতিহারা ?

ছঃখবাদী বন্ধুর প্রতি

সম্মুখে যা'র মিলেনাক দেখা, পশ্চাতে তাই আছে,
পিছু ফিরে' দেখ'—সেই জ্বল্জ্বলে জ্বলিছে বুকের কাছে !
যে চোখের আলো পলকে মিলায় স্থপতির আবরণে,
তা'র মাপকাঠি এতই কি খাঁটি—অনন্ত এ জীবনে ?
মন মন করে' যে অহঙ্কারে কথা কহ থাকি-থাকি'—
শুধাই তোমায়, সেই মনটারই সত্য স্বরূপটা কি ?

তার বাঁধা নাই যে মনোবীণায়, নাহি যা'র সুরবোধ.
ললিত বিভাস ভৈরোঁ। যে তা'র ভৈরব ছর্ব্বোধ !
ব্যথাবোধ আর সুরবোধে দৌহে জ্ঞাতি নহে কাছাকাছি ;—
চোখ থেকে তবু মধু ছেড়ে' ক্রেদে ঘুরেনা কি কাণামাছি ?
হাই তুলিছ যে—ঘুম এল নাকি,—বালিসটা দিব এনে ?
চৈত্র-হাওয়ায় দরকার নাই কাঁথা-কম্বল টেনে' ।
হেনার ঝাড়টা আচ্ছা বেহায়া—টবে থেকে খায় দোল,
মুছ দখিণায় তোমারই ভাষায় তুলিয়া আর্ত্তরোল !
নাকে ঢোকে তারই গন্ধের ব্যথা—চোখে দেখা যায় দেহ,
এত ব্যথা-বহা রূপটি কিন্তু মনে আনে সন্দেহ ।

কথাই কওনা—চটে' গেলে নাকি ? অথবা এসেছে ঘুম
নয়নতারায় মুদিয়া দিল কি গন্ধ ধূপের ধুম !
সুখ জেগে থাকে, ছঃখ ঘুমায়—শেষে কি বুঝিব তাই ?
চিরদিরহীরে তাই কি রাত্রে ডেকে সাড়া নাহি পাই !
আসল কথা কি,—যতখানি সুখ—ঠিক ততখানি ছঃখ,
দিবারাত্রির আলোয়-কালোয় যেমন কালের মুখ ।
সুখী বলে' তাই সুযোগ পেয়েছ ছঃখে জ্ঞানিবার,
নহিলে ছঃখে চিনিতে চক্ষে থাকিত না অধিকার !

মহাভারতী

পূর্ণিমা-রাত, হেনার গন্ধ—সুমন্দ দখিণায়,—
বন্ধুর নাকে বেদনার শাঁকে—মিছে বকে' মরি, হায় !

একা নিরুপায় বসে' ভাবি তাই—ছথ লাগে কেন গুরু ;—
ছথের চামড়া পাতলা—আর কি সুথের চামড়া পুরু ?
জন্ম হইতে সুখ পেয়ে, সুখে হয়ে যাই উদাসীন,
অনভ্যাসের পাতলা চর্মে ব্যথা করে চিন চিন !
মাতার স্তনে জন্মপুষ্ট ; পিতা পোষে বহুকাল,
শৈশব হ'তে শিথিতে হয় না ভাবনার জঞ্জাল ;
পনেরো আনারই অভাবের বোধ যৌবনে উঠে জেগে',
নূতন গজানো পাতলা চর্মে কামনার হাওয়া লেগে !
ছথের তাই—সর্বদা খাঁই, সুথের মেলে না ভাত,
সুথের দিবস তবু চলে' যায়, ছথের কাটে না রাত !

চোখ তুলে' দেখি—আকাশের চাঁদ ঢাকা পড়িয়াছে মেঘে,
একবার করে' হাবুড়বু খায়. আরবার উঠে জেগে ;
শঙ্কর-শিরে চিরঠাই যা'র—দীপ্তিদেবতা শশী,—
সেও আপনারে বজায় রাখিতে মাঝে মাঝে মাথে মসৌ !
হাওয়ার দেবতা পবন—তাহার দেখিবারে চাঁদমুখ,
ঘোমটা টানিয়া ঘোমটা খুলিয়া করে চির-কৌতুক !
বুড়া শিব—সে তো ব্যাজার হইয়া সৃষ্টি করে না রোধ,
—ছাংটা পাগল সন্ন্যাসী, দেখি—তারো আছে রসবোধ !
সুথেরই লাগিয়া ছথের সৃষ্টি—উচু আছে বলে' নীচু,
জীবনের পথ মুক্ত যখন, আছে আগু আছে পিছু ।

ভাটিয়ালী

আমি ও আমার প্রিয়র মাঝারে
 যে ছোট নদীটি বহে,
 কত ছলে সে যে তাহারই কথাটি
 কাণে-কাণে মোর কহে !
 কলকলি' আসে, খলখলি' হাসে,
 ছলছলি' যায় চলি' ;
 কেহ না বুঝুক, আমি যে বুঝি না—
 সে কথা কেমনে বলি ?

এপারে নদীর খরবেগখানি
 কূলের কোলটি ঘেঁসে,
 ওপারের জল অতল শীতল
 তটের প্রান্তদেশে ;
 এদিকের চর তৃষিত উষর—
 তৃণহীন বালুময়,
 লতা পাতা ফুলে ভরা আন-কূলে
 অসীমের বিশ্বয় !

নদীর ওপারে খানিক ওধারে
 উজানে প্রিয়র বাস,
 ভাটিমুখে তাই সংবাদ পাই
 নিতি-নিতি বারোমাস !
 রঞ্জিণ সাড়ীটি কবেই-বা কাচে,
 মাথাটি ঘষে বা কবে,—
 সাথে-সাথে তা'র বারতাটি আসে
 বর্ণে ও সৌরভে !

মহাভারতী

ভেসে-আসা তা'র চুলের ফুলটি
 কভু-বা ধরিয়া রাখি,
 ধরিতে পারিনা জল-তরঙ্গে
 সঙ্গের কথাটা কি !
 ইঙ্গিতে আর ভঙ্গীতে ভরি'
 যত ভাবি সেই কথা,
 চকল জলে তত ছলছলে
 পারের মন্তরতা !

সন্ধ্যাবেলায় সহজ লীলায়
 যে ঘট সেথা সে ভরে,
 চেউখানি তা'র কেঁপে-কেঁপে লাগে
 এপারের বালুচরে ;
 সেথায় বাগানে কোকিল ডাকিলে,
 হেথায় হেনার ঝাড়ে
 ফুটে উঠে ফুল গন্ধে আকুল—
 রাতের অন্ধকারে ।

চখা চখী যা'রা চরে এই চরে,—
 সন্ধ্যাব কিনারায়,
 চরণ-চিহ্ন রাখিয়া এপারে
 ওপারে উড়িয়া যায় ;
 জানিনা—সেথা কি সুধার সাগর
 আছে ওপারের কোলে,
 দিনের পাখীরে রাতে যা' ভুলায়ে
 উন্মনা করে' তোলে ।

ভাটিয়ালী

জলের কিনারে সারারাত ধরে'

পেতে' বসে' থাকি জাল,

রাতের আধার মুছে' দিবে যায়

মনের অন্তরাল ;

চোখের বালাই কিছু যবে নাই,—

ঘুচে' যায় দূরে-কাছে,

নিশার মশারীতলে ভাবি—প্রিয়া

মোরই পাশে শুয়ে আছে !

পায়ের তলায় দোল দিয়ে যায়

চিরপরিচিত ঢেউ,

থম্‌থমে' রাত, লুকায়ে কোথাও

দেখিবার নাহি কেউ ;

ফিস্ ফিস্ করে' সেই ফাঁকে তা'রে

বলে নিই যত কথা,

দিনে বড় বাধা—রাতের আধারে

জানাই প্রাণের ব্যথা !

মাছের আওয়াজে মোহ ভেঙে যায়,

চোখ মেলে' দেখি চেয়ে,—

কোলের নদীটি কালেরই মতন

চুপি চুপি চলে বেয়ে ;

গাঙ-চিলেদের কলরব উঠে

ওপারের ঝাউ বনে,

বাঁশের মাচায় রাত কেটে' যায়

তন্দ্রায় জাগরণে ।

মহাভারতী

উষা-বধু আসি' সোনার খাঁটায়
করে সংমার্জনা—
গগনান্ধনে জমে'-উঠা কালো—
রাতের আবর্জনা ;
ফুটে' উঠে যত পরিচিত রূপ—
নদী, নদী-পরপার,
তা'রি সাথে সেই চিরমোহময়ী
মূর্তিটি কামনার !

তরীখানি মোর নদী-কোলে-কোলে
বুথায় ঘুরিয়া মরে,
ছোট বৃকে তা'র ঠাই হওয়া ভার,
ছ'জন নাহিক ধরে ;
চির-নিরুপায় একা বাহি তাই
একক প্রাণের বোঝা—
লবণ সাগরে এ যেন হয়েছে
তৃষ্ণার বারি খোঁজা !

তাই যদি হয়, মনে ভাবি আরও
উজানে বাঁধিব ঘর,
নদীমুখে তা'রে তবু তো জানা'তে
পারিব এ অন্তর ;
যতদিন এই খর বেগখানি
বহিবে নদীর জলে,
ভাটিয়ালী সুর ধনিবে বিধুর
পারের অতলতলে ।

পঞ্চাশোন্ধে

পঞ্চাশোন্ধে বনে যাবে—চলেছি তাই বনে !
 মনটা তবু থেকে-থেকে ছলছে ক্ষণে-ক্ষণে ;—
 কত দিনের ঘরের সাথে কতই পরিচয়,
 কত দিকের কত বাঁধন, কত-না সঞ্চয় ;
 হাজার পাকে শিকড়-বেড়া চিত্ত-লতার জালে
 কেমন করে' উপড়ে আবার বাঁধব গাছের ডালে !
 বাক্যহারা ঘর-বধূ যে বাতায়নের ফাঁকে
 অশ্রুজলের আবছায়াতে দৃষ্টি মেলে' থাকে !

ভাবছি মিছে—যেতেই হবে, এলই যখন ডাক,
 মনের কাণে ঢেউ তুলেছে সন্ধ্যালোকের শাঁক ;
 দিনের দাহ জুড়িয়ে আসে দেহের সৌমানায়,
 অস্তরবির রঙটি লেগে' বনটি কি মানায় !
 সিঁদুজলের গন্ধ-আমেজ লাগছে এসে নাকে,—
 এই অবেলায় ঘরের খেলায় বন্দী কি কেউ থাকে ?
 সন্ধ্যাতারায় দৃষ্টি হারায়, সামনে পিছে কালো,
 পারের পথের যাত্রী যখন, এগিয়ে থাকাই ভালো !

আজ মনে হয়, বনের মানে—মুক্তিরই স্বাদ চাখা,
 বাঁধন যবে ছিঁড়তে হবেই, ভার কেন আর রাখা !
 দেহের শিকল কাটার আগে, আল্গা করি' মন
 মুক্ত পথে রাখাই ভালো মুক্তি-নিমন্ত্রণ ।
 বৈতরণীর মন্দিরে যে পারের ঘণ্টা বাজে,
 তক্মা তাবিজ, তল্লী কি আর লাগবে কোনও কাজে ?
 দেহের ক্ষুধার যোগান্ দিয়ে, ছুটির আগে আজ
 মনের ক্ষুধার তৃপ্তি লাগি' নাই কি কোনো কাজ ?

মহাভারতী

যতই বলুন কবির। সব—“কোকিল ডাকের মানে,
পঞ্চাশতের নীচে যা'রা, তা'রাই ভালো জানে।”—
চঞ্চলতার মাঝ-দরিয়ায় শ্রোতের মুখে ভেসে'
কবে কে আর দেখল চেয়ে তটের সীমা-দেশে !
শ্রোত কাটিয়ে বসতে পেল শান্ত হয়ে তটে,
কুঞ্জ-শোভা তখন পড়ে সহজ অঁখিপটে ।
আপন-হারা আকুল বনে কোকিল ডাকে মিছে,—
কুহুধ্বনি মারা পরে রক্তধ্বনির পিছে !

অন্ধ বকুল গন্ধ-পথে দেয় যে লিপিখানি,
প্রিয়ার খোঁপায় কে বুঝবে হয় ! তা'র বেদনার বাণী ?
মধুস্বতুর উৎসবে যে বাঁধতে চাহে ঘরে,
তা'র চোখে কি পুষ্পশোভার উৎস ধরা পড়ে ?
লতার বেণী বাঁধন হয়ে বাঁধে যে তা'র মন,
মিথ্যা পাঠায় সৃষ্টি তা'রে দৃষ্টি-নিমন্ত্রণ ।
নয়ন-পথে গ্রহণ যাহার, চয়ন-পথে নয়,—
যে জন অবোধ, সেই রসবোধ তা'র কাছে কি হয় !

মিথ্যা ভাবা ঘরের কথা—কোথায় তোমার ঘর ?
শাখার ফাঁকে ঐ দেখা যায় বিশ্ব-চিদম্বর !
সীমাহারা ঐ আকাশে মুক্ত হাওয়ার মাঝে
প্রাণের কাণে শোন্ দেখি—কোন্ না-শোনা সুর বাজে ।
স্মৃতিকা-ঘর রয়না যেমন গৃহবাসের ঘরে,
মাটির-হাঁটের-কাঠের ঘরের বদল পরে-পরে,
দেহবাসের ঘরও যখন মনোবাসের নয়,—
বনবাসেই যাক্ না দেখা শেষের পরিচয় ।

সন্ন্যাসী

ওগো সন্ন্যাসী, ওগো উদাসীন, মিনতি তোমার কাছে,—
বলো একবার, জীবনে তোমার—কি ধন চাওয়ার আছে।
গিরিগুহাতলে আসন পেতেছ ঘন অরণ্যমাঝে,
নরের দৃষ্টি—সমাজের আঁখি—সহিবারে পারো না যে !
বিষয়বাসনা বিষেরই মতন ত্যজিয়া গিয়াছ চলি'
ধূলিসম এই ধরণীর মায়া হেলায় ছ'পায়ে দলি' ;
বনের পশুরে সঙ্গী করেছ, সাথী বনতরুলতা,
মুখের বাণীরে বন্ধ করেছ বন্দিয়া নীরবতা !
ঘন জটাজ্জালে ঢাকি' চারু কেশ, ললাটে ভস্ম মাখি'
প্রকৃতির পানে রুধেছ সবলে প্রকৃতিরই দেওয়া আঁখি ;
—সব ডাকাডাকি ছাড়িয়া গোপনে কা'রে ডাকি' দিবারাতি
কাটাইছ কাল—কিসের আশায়, পাষাণে আসন পাতি' ?

কে তোমাতে প্রভু জন্ম দিয়াছে, ছিলনা কি মাতাপিতা—
সুখ-শৈশব কা'দের অঙ্কে কাটিয়াছে জান কি তা' ?
ও কঠিন দেহ পুষ্টি লভিল্ কা'দের অন্ন-জলে,
কা'র কাছে তব দেবতার নাম শিখেছ কৌতূহলে ?
অসহায় দেহ, অশরণ মন—কোন্ সমাজের স্নেহে
বাড়িয়া উঠেছে কোন্ পল্লীর কোন্ অকরণ গেহে ?
কাহার বক্ষে চরণ ফেলিয়া ছাড়িয়া এসেছ কা'রে
কাহাদের কথা বিপুল যত্নে ভুলিয়াছ একেবারে !
কৃতজ্ঞতার কোনো অধিকার কা'রো বুঝি তা'র আছে,—
তাই কি সুদূরে সরিয়া এসেছ দেখা পাও কা'রো পাছে !
ধরণীর স্নেহে তরনী করিয়া সরণি হয়েছ পার,
—কিসের নৌকা, কে-বা তা'র মাখি' ? ধারো না কাহারো ধার !

মহাভারতী

বুড়া বিধাতার ভুল হয়েছিল—মানবের গৃহবাসে
মানুষ করিয়া পাঠা'লো তোমায়, না বুঝে' এ পরিহাসে !
কেমনে চিনিবে অস্তুর তব—মর্শ্ববাসনা গুট—
পাষাণের মাঝে পাথর তোমারে গড়িতে পারেনি গুট !
কে জানিত আগে, মুক্তির লোভে শুধিবারে দেবঋণ,
পিতৃঋণেরে এত বড় ফাঁকি দিতে পারে কোনো দীন ?
মায়ের ভায়ের স্নেহ—সে তো মায়া, মিছে সমাজের দাবী—
দেশ—সে তো মাটি—অগ্নে তাহার কোথা মুক্তির চাবি !
তোমার মোক্ষ তোমারি সে শুধু—স্বীয় সাধনার ধন,—
দশজনে টেনে রাখিবে তোমারে মায়ায় ভুলায়ে মন ?
এত বড় 'ছোট' নহ তুমি দেব,—ধরণীর মোহে তুলি'
তোমার স্বর্গ পরের কথায় 'শিকায় রাখিবে তুলি' !

ধিক্ সন্ন্যাসী, ধিক্ উদাসীন, ধিক্ হে মুক্তিকামী,
শ্রীপদে তোমার শতবার ধিক্—হে মোক্ষপথগামী !
মানুষের ঘরে মানুষ হ'বার যোগ্যতা নাহি যা'র,
স্বর্গের লোভ সাজে কি তাহার—দেবতার অধিকার !
পিতা কঁাদে ভূঁয়ে, মাতা পথে শুয়ে মুমূর্ষু গৃহহীন,
ক্ষুধা-অপরাধে ভাইবোন কঁাদে—নিজবাসে পরাধীন !
তুমি খুঁজিতেছ আপনার পথ, ভাবিয়া তা'দের মায়া,
যা'দের মায়ায় মানুষ হয়েছ, যা'দেরি রক্তে কায়া !
হায় কাপুরুষ, হায় পলাতক, হায় ভীকু, হা রে দীন !
স্বার্থ-আশায় মনুষ্যহে এত বড় উদাসীন—
সহিতে পারেন শুধু তিনি—যার আকণ্ঠ ভরা বিষে,
মানুষের 'পরে হেন পরিহাস মানুষ সহিবে কিসে ?

সন্ন্যাসী

সন্ন্যাসী শিব—বিশ্বের শিবে আছেন চক্ষু বুঁজি’—
 গৃহিণীকে দিয়ে অন্নের ভার—অর্থ তাহার বুঝি’ ;
 পূর্বপুরুষে উদ্ধার লাগি’ সন্ন্যাসী ভগীরথ,
 সগরবংশে অর্গে বহিল তাহার পুণ্যরথ ;
 বুদ্ধ নিমাই—মানুষেরই ভাই, জীবের মুক্তি লাগি’
 ছঃখ-দূরের পন্থা খুঁজেছে গৃহহীন বৈরাগী ;
 জানি শঙ্কর-ব্রহ্মচর্য্য, বুঝি তা’র মায়াবাদ—
 রামকৃষ্ণের সেবাধর্ম্মের জগৎ চিনেছে স্বাদ ;
 —তব ভাঙারে কোন্ সে বিত্ত সঞ্চিৎ কা’র তরে ?
 স্বার্থ-সাধনা-ছন্দের বেশে ভুলাইবে কোন্ নরে !
 যাহারে ডাকিয়া ভস্ম মাখিয়া কাটাইছ নিশিদিন—
 জেনো—ধরা তাঁর স্নেহেরই আগার—তিনি ন’ন উদাসীন !

অনাগত

বরষের খেয়া বেয়ে বন্ধু মোর চৈত্ররাত্রিপারে
 পার হ'য়ে গেল অন্ধকারে ;
 বিদায়ের কোনো বাণী না কহিয়া কিছু,
 নিঃশব্দ প্রশান্ত মুখে গেল শুধু মাথা করি নীচু ।
 সুখেতুঃখে বাধি' ঘর—মোরা, যা'রা দীর্ঘ দিনেরাতে
 এতদিন ছিন্ত সাথে-সাথে,
 স্তব্ধ রহিলাম বসি' তীর প্রান্তে চাহিয়া সম্মুখে
 ব্যথাহুর বুকে ।

ধূসর বালুকাতটে নাহি আলো—নাহি অন্ধকার,
 অস্পষ্ট উষার আলো ইঙ্গিতে জানায় বুঝি পার—
 বহুদূরে মোহনার শেষে,
 নক্ষত্রের রশ্মি ধরি' বন্ধু মোর গিয়াছে যে দেশে !
 নিশান্তের হিম বায়ু কাঁটা দিল আকাশের গায়ে,
 নয়নে নামায়ে তন্দ্রা, অবসাদে অঙ্গটি জড়াবে ।
 তা'রি মাঝে, মনে হ'ল, সহসা জাগিল কলতান,
 উন্মিষ্ক সাগরের গান—
 ঐ আসে,—ঐ আসে, ঐ বুঝি আসে অনাগত !
 —নরনারী, মাথা করো নত ।
 দিগন্তে ছলিছে তা'রি মেঘে-মেঘে বিজয়-পতাকা—
 পিঙ্গল শঙ্করজটা প্রলয়ের জলদর্চি মাথা ।
 সুদূর সিদ্ধুর বক্ষে ঐ আসে, ঐ আসে সে কি !
 ভয়ে-ভয়ে দেখি—

ও কি রূপ ভীম ভয়ঙ্কর
 অতীত বন্ধুর মতো ও তো নহে প্রশান্ত সুন্দর ।
 ক্রকুটি-কুটিল ভালে, দূর থেকে, যেন যায় দেখা
 উচ্ছ্বসিত সত্ত্ব রক্ত-রেখা !
 প্রচণ্ড ঘণার হাস্ত ফুরিছে বিষণ্ণ আশ্র 'পরে,
 উচ্ছ্রিত সুদীর্ঘ বাহু উদ্ধৃত ত্রিশূল ধরি' করে ।

অনাগত

—এ কি রূপ, এ কি মূর্তি—এই অনাগত !
 এই মানবের বন্ধু—সমুদ্রত সংহার-উদ্বৃত্ত ?
 তীরে নীরে চারিধারে তবু উঠে তা'রি জয় জয়,
 ভয়ঙ্কর ভয়মাঝে কোন্ মন্ত্র বিতরে অভয় ?
 সিদ্ধুতীরে সিদ্ধুর উচ্ছ্বাসে
 বিচিত্র শ্রমিকদল যন্ত্র-হাতে ভীড় করি' আসে,—
 কৃষক লাঙ্গল ধরি', তন্তুবাঁয় তন্তু ধরি' করে,
 কৰ্ম্মকার অভ্যর্থনা করে শ্রদ্ধাভরে
 হাতুড়ি তুলিয়া উর্ধ্বে নবাগত বীরপানে চাহি' ;
 নিরন্ন লাঞ্ছিত ক্রিষ্ট—শিল্পিদল গান গাহি'-গাহি'
 বরি' লয় আগন্তকে উদগ্র ইন্দ্রিতে—
 কৰ্কশের কোলাহলে বাঁধি' যেন উন্মত্ত সঙ্গীতে !
 চোখ মেলি' চেয়ে দেখি—বৈশাখের আতপ্ত প্রভাত
 জলে স্থলে হানে যেন রুদ্রের প্রদীপ্ত রশ্মিপাত !
 ছন্দে দ্বন্দ্ব নিরানন্দে কন্মীরা চলেছে সব কাজে !
 —দূরে কোথা যন্ত্রকণ্ঠে প্রাহরিক বাজে !
 দারুগন্ধী কৃষ্ণকায় ধীবরের দল
 জলে ভাসাইয়া ভেলা করিছে উন্মত্ত কোলাহল !
 সম্মুখে সূদূরে হোথা মগ্নপোত বেড়ি'
 সিদ্ধু-শকুনের দল উড়ে ঘেরি'-ঘেরি' ।
 নানা দিকে, নানা বর্ণে—নানা সূত্রজালে
 সৃষ্টির বয়ন চলে বিধাতার লীলা-তন্তুশালে ।

চলিয়াছি ঘরে,—

অপূর্ব তন্ত্রার কথা বার-বার স্মরিয়া অন্তরে ।
 —ভাবিতেছি, এই যদি হয়,—
 শিবের তপস্যা যদি রুদ্রহস্তে হয় সে অক্ষয়,
 —নাহি ভয়, হোক জয়, হোক তা'রি জয় !

তাজমহল

মমতাজ নাই, তাজ আছে,—তাই

মমতাজে মোরা চিনি,
রূপাতীত রূপে ব্যথিতের বেদনায় ;
একের চক্ষে একান্ত হয়ে

ছিল যে বা একাকিনী,
বিশ্বে সে আজি শাস্বত সেবা পায় !
রূপ ক্ষণিকের আঁখির স্বপ্ন—

জোয়ারের জলরাশি—
নিমেষে মিশায় কাল-স্রোতের মুখে,
সাধনার বলে অদেহী দেবতা

অপরূপে উদ্ভাসি'
অমর হইয়া উঠে মানবের বুকে ।

কবে কালিদাস লিখিল কাব্য

কাগজের সাদা পাতে
বিরহ-মসীতে ডুবায়ে প্রাণের তুলি,
বিশ্বজগৎ লিখি' দাসখৎ

দিল তা'রি বেদনাতে,
প্রতিদিনকার গৃহ-সংসার ভুলি' ।
সাদার বন্ধে কালোর ছঃখ—

আঁখিপটে আঁখিতারা—
তাহারি আলোক পড়ি' প্রেমিকের চোখে,
দেখায়ে অপার প্রেম-পারাবার

করি দেয় দিশাহারা,
মেঘদূত হয়ে ফিরে তাই লোকে-লোকে ।

তাজমহল

কবি সাজাহান রচিল তেমনি

শ্যাম ধরণীর বুকে—

সাদার আখরে যে শোক-আলিম্পনা ;

শুভ্র পাথরে গাঁথা সেই ব্যথা

নেহারি উর্দ্ধমুখে

আজো করে ধরা আঁখি সংমার্জনা ;

কালের বক্ষে সে শ্লোকের শোক

চিরবিরহের রূপে

বৈধব্যের শ্বেতবাসসম রাজে,

বিশ্বভুবন বিস্ময়ে হেরি'

নিঃশ্বসে চুপে চুপে—

কবেকার ব্যথা বুঝিতে পারে না তা যে !

মন খোঁজে মন—হোক বন্ধন,—

দেহ খুঁজে' মরে দেহ,—

প্রেমের ধর্ম ভালো জানে মানে তা'র :

ছ'দিনের যাহা, ছ'দিনে ফুরায়,

তাই বুঝি সন্দেহ—

মরণে গাঁথিয়া পরে সে গলার হার !

মনে ভাবে বুঝি—আমি যাই, তা'র

নাহি ক্ষোভ, নাহি ক্ষতি,—

ব্যথা বেঁচে থাক্ সন্তানরূপ ধরি',

প্রিয়-বিরহের স্মৃতিতে লভে সে

অমরার সদৃশতা,

কালের কালীতে সকলের কোল ভরি' ।

মহাভারতী

হোক সব মিছে, প্রেমের সত্য—

সে বুঝি মিথ্যা নয়,
নহে সে দ্বন্দ্বিক ঐশ্বর্যের মত ;
রাজ্য ও রাজা বিজয়ীর হাতে

সেও লভে পরাজয়,
আজ যাহা আছে, কাল তাই অপগত !
ছুঃখ অমর, নাহি তার ঘর,—
আগুনে হয় যা' দাহ,
বুক হ'তে বুকে বাঁধে শুধু তা'র বাসা ;
চিরমানবের মনে যা' গোপনে

বহে তা'র পরীবাহ,
কালের কিনারে এই কি আলোর আশা !

হয় তো বা কোন্ সুদূর দিনের

অলঙ্ঘ্য অভিঘাতে,
পাষণ-হর্ষা—এও ধূলি হ'য়ে যাবে ;
মর্ম্মরময়ী যে রূপ-কীর্ত্তি

গড়া মানুষের হাতে,—
মানুষের চোখে নির্ঝাঁপ তা'র পাবে !
হাসি' মহাকাল ভরি' জটাজাল

মাখিবে না শুধু ছাই,
গঙ্গার মতো বহিবে তাহার প্রীতি,
ভারত যেমন মরিয়া করেছে

মহাভারতের ঠাঁই,
চোখ হ'তে বুকে জমায়ে শোকের স্মৃতি ।

কৃষ্ণা

কে তাপস প্রতিহিংসায়জ্ঞে

কৃষ্ণবস্ত্রে ঢালিল হবি ;

কন্যা কৃষ্ণা জাগিয়া বসিল

শিখাশতদলে জন্ম লভি' ?

—আকাশে হৈল দৈববাণী,—

'জতুগৃহে ওই সন্ধ্যা জ্বলিল,

সাবধান, যত অসাবধানী !'

*

*

*

অবলার দলে তুমি বলবতী

হে দেবি, আপন পুণ্যে পাপে,

যুগসঞ্চিত জঞ্জাল জ্বলে

তোমাতে পরশি' হে ছতবহ !

যুগান্তরের সর্ব্বনরের,

হে নারি, স্তব্ধ প্রণাম লহ ।

শুনিল যেদিন এই ভারতের

উদ্ধতশির ক্ষত্র সবে—

তোমাতে লভিতে হেঁটমুখে রহি'

আকাশে লক্ষ্য বিধিতে হবে !

—এল দলে দলে অযুত নৃপতি

স্বয়ম্বরের সে সভাতলে,

তুমি দিলে মালা চীরবাসে ঢাকা

লক্ষ্যবেদ্য ভিখারিগলে !

মহাভারতী

অপরিচিতের পার্শ্বে দাঁড়ায়ে
 নির্ভয়ে নারি, হেরিলে তুমি,
 যত কাপুরুষ রাজার রক্তে
 রঞ্জিত হ'ল পিতৃভূমি ।
 জগন্নাথের শঙ্খ ধ্বনিল
 তব ভিখারীর শ্রবণ-মূলে ;
 স্বর্গ হইতে বাণে-ভরা তুণ
 নেমে এসে' তা'র পৃষ্ঠে ছলে !
 তব দয়িতের ছদ্ম বীর্যো
 বিস্মিত হ'ল বিশ্ববাসী,
 তুমি বিস্মিত হয়েছিলে কি না,
 সে কথা জানেনা বেদব্যাসই ।

ভিখারীর সাথে ফিরিয়া কুটীরে
 শুনিলে—তোমার পঞ্চপতি !
 নিশীথ-ঝিল্লী থামিল কাননে,
 বিকারবিহীন তুমি গো সতি !
 তুমি যে জানিতে—কে আছে পুরুষ
 একা ধরে তব পূর্ণ পানি ?
 উঠেছ অনলে নারীর গর্বে
 নারীর গর্ভ তুচ্ছ মানি' !
 বিবাহ-আসনে বামাদ্রুষ্ঠ
 দিলে তুমি রাজা যুধিষ্ঠিরে,
 তর্জনী তুলি' দিলে বৃকোদরে,
 মধ্যমা—হাসি' পার্থবীরে ;

কৃষ্ণা

ঈশং নামায়ে দিলে অনামিকা,
 ধরিল নকুল হৃষ্টমনে,
 কনিষ্ঠা তব পরশ করিয়া
 সহদেব স্বীয় ভাগ্য গণে ।
 পাঁজি পুঁথি ল'য়ে খুঁজে মুনিগণ
 সতীর পঞ্চপতির হেতু,
 কল্পনা গাঁথি' জন্ম হইতে
 জন্মান্তরে বাঁধিল সেতু ।
 কেহ বলে—তুমি তপস্শাস্ত্রে
 পাঁচবার পতি চাহিয়াছিলে,
 ভাং-খোর ভোলা দিল পাঁচ বর,
 তাই পাঁচ পতি ভাগ্যে মিলে !
 কেহ বলে—তুমি অশ্রু জন্মে
 স্বামি লাগি' পুনঃ বসিলে তপে,
 পঞ্চদেবতা আসি' এক সাথে
 তোমাতে তা'দের হৃদয় সঁপে !
 —সে সব কাহিনী জানি বা না জানি,
 তেজস্বিনী গো, তোমাতে চিনি,
 আপন যোগ্য পুরুষ সৃষ্টিতে
 জন্ম জন্ম তপস্বিনী ।
 দেবতারা মিলে' গড়িতে পারেনি
 তোমার প্রাপ্য তপের নিধি,
 তাই গো সাক্ষি, পঞ্চপ্রদীপে
 তোমাতে আরতি করিল বিধি ।

মহাভারতী

মাটির গর্ভে জন্মে যে সতী —

সে দিল পরখ অনলে পশি',

অনলকুণ্ডে জন্মিল যে বা,

তার সতীত্ব কোথায় কষি ?

রাজসূয়ে যা'রা করেছিল রাণী,

জুয়া হারি' তোমা বেচিল তা'রা,—

হে শিখারূপিণি, না জানি কেমনে

তখনো হওনি ধৈর্য্যহারা !

মর্মান্তিক জাগরণে জাগি'

ফুটিল কি মুখে কুটিল হাসি,

শুনিলে যখন আজ হ'তে তুমি

নূতন রাজার পুরাণো দাসী !

দন্তফীত সে রাজশাসন

কটি হ'তে তব বসন টানে !

হুতাশন হ'তে হুতাশনশিখা

গতাস্থ বিনা কে ছিনায়ে আনে ?

পুরুষের মাঝে বিবজ্জা তুমি,—

ধর্ম্মমেঘেরা শাস্ত্র ভাবে !

পুরুষ ছিল কি সেই সভাতলে

যা'রে দেখে তুমি লজ্জা পাবে ?

শুধু বুঝে' নিলে—নরের রাজ্যে

কত নিরুপায় নিখিল নারী ;

প্রমোদরাতে ও রাজার সভাতে

রহিল সমান প্রমাণ তা'রি ।

কৃষ্ণা

সেদিন সহসা দিব্যদৃষ্টি

ফুটিল তোমার নয়নপাতে,
দেখিলে চাহিয়া—কোন ভেদ নাই

যুধিষ্ঠিরের, শকুনি সাথে !
কর্ণে পার্থে কি পার্থক্য ?

কি ভেদ দ্রোণে ও দৌবারিকে ?
ধর্ম সে শুধু নরের জন্ত,

ফিরেও চাহে না নারীর দিকে !
হুঃশাসনেরই স্বজাতি ভীষ্ম,

মর্শ্বে সেদিন বুঝিলে মাতা,—
ক্রুর নগ্নোরু হৃষ্যোধন যে

বিমূঢ় গদারু ভীমেরই ভ্রাতা !
সেদিন আকাশে লিখে' দিলে পণ

ক্ষণকটাক্ষে বজ্রভরা—
নরশূন্য না করিলে কখনো

নারীর যোগ্য হবে না ধরা ।

তব চক্ষের বিদ্যাজ্জ্বালা

কৃষ্ণমেঘের বক্ষে ফুটে'
দিক্চক্রে কি ঘূর্ণা জাগা'ল ?

সারা অস্থর ছি'ড়িয়া লুটে !
বর্ধাবারিত দাবাগ্নিসম

ভ্রম' বনে বনে মৌনমুখী,
সহিয়া নারীর সহজ গর্বে

নারীজীবনের সর্ব্ব হুখই ।

মহাভারতী

হীন পরিচয়ে কাটে কতদিন
 বিরাটের হীনা রানীর ঘরে,
 কামান্দ পশু রাজার সভায়
 বামপদে তোমা প্রহার করে !
 ঘরে কি বাহিরে, হে বহ্নিশিখা,
 যেথা জলিয়াছ স্মৃথে কি ছখে,
 পতঙ্গসম যত লাঞ্ছনা
 ঝাঁপায়ে পড়ে কি তোমারি বুকে !

ঘুরে' যায় চাকা,—দূরে যায় দেখা—
 প্রলয়শীর্ষে ছুটেছ রানি,
 পাঁচতুরঙ্গী মনোরথে তব
 পাঁচ অঙ্গুলে বন্না টানি' ।
 অন্ধোহিণী অন্ধোহিণী
 কুরুক্ষেত্রে বাহিনী পড়ে,
 পড়িল ভীষ্ম, পুড়িল দ্রোণ,
 ডুবিল আরুণি, শল্য মরে !
 মরে কুরু—মরে পাণ্ডবদল,
 মরে পান্ডাল নির্ব্বিচারে,
 বালকেরে ঘিরে' মারে সাতবীরে,
 নিবারণ সেথা কে করে কা'রে ?
 সেই নরমেধে যজ্ঞ-অগ্নি
 জলিতেছ তুমি যাজ্ঞসেনী,
 উড়াইয়া শিরে শিখার শিখরে
 পুঞ্জধূমের মুক্তবেণী !

রুক্ষা

যত নারী যেথা হ'ল লাঞ্ছিতা

প্রায়শ্চিত্ত করিল কুরু,

রক্তসন্ধ্যা গড়ায় আকাশে,—

কে লুটে ধরায় ভগ্ন-উরু।

—তবু কোথা শেষ ? পঞ্চপুত্র

মরিল গুপ্তঘাতক করে,—

কাদে ফাল্গুনী, কাদে বৃকোদর,

তব চোখে শুধু অগ্নি ঝরে !

তুমি শুনেছিলে—ব্রাহ্মণাধম

মৃত্যুরে নাকি দিয়াছে ফাঁকি,

তাই তব করে মৃত্যু-অধিক

শাস্তি তাহার র'য়েছে বাকি !

দিলে অনুমতি—'নরসর্পের

লাঞ্ছিত শির খড়্গে চিরে'—

মিলে যদি মণি আনিবে এখনি,

উপহার দিব যুধিষ্ঠিরে।'

ক্ষতশির সেট অশ্বখামা

আজও ছোটো শুনি মাটির তলে,

অমর তাহার দেহ-দীপাধারে

কি অনির্বাক্য মরণ জ্বলে !

ভারতের নর নিঃশেষ যবে

নারীমর্যাদা প্রতিষ্ঠিতে,

কে জানে সেদিন কোনও ব্যথা নারি,

জ্বেগেছিল কিনা তোমার চিতে !

মহাভারতী

সেই সন্ধ্যায় ফিরিলে যখন
 শূন্য তোমার দেউল-তলে,
 কোথা ধূপমালা, উপচারখালা ?
 শুধু সে পঞ্চপ্রদীপ জ্বলে !
 ত্রিয়মাণ তা'র পাণ্ডুর ভাতি
 কাঁপে মন্দির অন্ধকারে,
 হবিভারে হোমকুণ্ডের শিখা
 মূচ্ছিত পাশে ভস্ম-আড়ে ।
 সে প্রদীপে আর সহেনা আরতি,
 সে অনলে আর বহেনা ছত ;
 বাহিরে ঘনায় অকূল রাত্রি
 নিখিল নারীর অশ্রুপ্লুত !
 মন্দির ছাড়ি' দাঁড়ালে ছুয়ারে
 চাহিয়া সে শীত-নিশীথ-নভে,
 দূরে দূরে যা'রা জ্বলিছে নীরবে
 হাতছানি তা'রা দিল কি সবে ?
 বাতিরিলে মহাপথে হে তাপসি,
 ললাটে লিখিয়া কিসের লিখা ?
 বিশ্বনারীর লাঞ্ছনা, না ও
 যজ্ঞশেষের ভস্মটীকা ?

* * * *

বহুযুগান্তে গগনপ্রান্তে
 যুগের শব্দ বাজিছে ওকি !
 তোমারে জাগাতে কে জ্বালে অনল ?
 হে কৃষ্ণা, অয়ি কৃষ্ণসখি !*

* আমারই অনুরোধক্রমে কবি-বন্ধু যতীন্দ্রনাথ সেনগুপ্ত এই কবিতাটি রচনা করিয়াছেন। এই কাব্যগ্রন্থে লিখিত ভারতকথার সুরের সহিত ইহার সুরও মিলিয়াছে। তাই, মহাভারতীর "কৃষ্ণা" কথাতেই মহাভারতীর শেষ করা গেল।—লেখক